

Aushi: Bible for Marko

Formatted for Translators

©2022 Wycliffe Associates

Released under a Creative Commons Attribution-ShareAlike 4.0 International License.

Bible Text: The English Unlocked Literal Bible (ULB)

©2017 Wycliffe Associates

Available at <https://bibleineverylanguage.org/translations>

The English Unlocked Literal Bible is based on the unfoldingWord® Literal Text, CC BY-SA 4.0. The original work of the unfoldingWord® Literal Text is available at <https://unfoldingword.bible/ult/>.

The ULB is licensed under the Creative Commons Attribution-ShareAlike 4.0 International License.

Notes: English ULB Translation Notes

©2017 Wycliffe Associates

Available at <https://bibleineverylanguage.org/translations>

The English ULB Translation Notes is based on the unfoldingWord translationNotes, under CC BY-SA 4.0. The original unfoldingWord work is available at <https://unfoldingword.bible/utn>.

The ULB Notes is licensed under the Creative Commons Attribution-ShareAlike 4.0 International License.

To view a copy of the CC BY-SA 4.0 license visit <http://creativecommons.org/licenses/by-sa/4.0/>

Below is a human-readable summary of (and not a substitute for) the license.

You are free to:

Share — copy and redistribute the material in any medium or format. Adapt — remix, transform, and build upon the material for any purpose, even commercially.

The licensor cannot revoke these freedoms as long as you follow the license terms.

Under the following conditions:

Attribution — You must attribute the work as follows: "Original work available at <https://BibleInEveryLanguage.org>."

Attribution statements in derivative works should not in any way suggest that we endorse you or your use of this work.

ShareAlike — If you remix, transform, or build upon the material, you must distribute your contributions under the same license as the original. No additional restrictions — You may not apply legal terms or technological measures that legally restrict others from doing anything the license permits.

Notices:

You do not have to comply with the license for elements of the material in the public domain or where your use is permitted by an applicable exception or limitation.

No warranties are given. The license may not give you all of the permissions necessary for your intended use. For example, other rights such as publicity, privacy, or moral rights may limit how you use the material.



Marko

1

¹Uku ekutendeka kwa mbila nsuma ya kwa Yesu Kristu, Umwana wakwa Lesa. ²Ngefyo calembwa muli Esaya kasesema, "Mona, nkotuma inkombe yandi kuli mwebu, uyo uukamipekanishisha inshila yenu. ³Ishiwi lya ukobilikisha mu matololo, 'teyanyeni inshila yakwa Shikulu; pangen i inshila shakwe ishakutambalala.'" ⁴Yohane alishile, akobatisha mu matololo no kulashimika ulubatishe lwa kulapila pakwelelwa kwa membu. ⁵Icalo conse ica Yudea na bantu bonse aba mu Yerusalemu balifumine ukuya kuli ena. Bali batishiwe kuli ena mu mumana wa Yodani, ukulalapila imembu shabo. ⁶Yohane alifwele ilaya lya masako ya ngamali no mushipi wa mpapa mu musana wakwe, kabili alikulya ifipaso no buci bwa mpanga. ⁷Alikushimikila, ukweba ati, "Umo uukesa panuma yandi uwakwatisha amaka ukuncila; ne tambo sha pa ndyato shakwe ntalingile ukukontama no kukakula. ⁸Nali mibatishe na menshi, lelo akamibatisha no Mupashi wa Mushilo." ⁹Calicitikile mu nshiku shilya ukwebati Yesu alifumine ku Nasareti mu Galili, kabili alibatishiwe kuli Yohane mu mumana wa Yodani. ¹⁰Ulo Yesu aishile kutumpuka ukufuma mu menshi, alimwene imyulu shaisuka no Mupashi ukoisa pali ena kubati lukunda. ¹¹Ishiwi lyalishile ukufuma mu myulu ati, "Uli Mwana wandi uwatemwikwa. Naliba uwa kubekelwa sana muli webo." ¹²Elo Mupashi walimuntungulwile ukuya mu matololo. ¹³Ali mu matololo inshiku amakumi yane, ali kutunkwa na Satana. Ali ne nama sha mpanga, na bamalaika balimupyungile. ¹⁴Nomba panuma yakwikatwa kwakwa Yohane, Yesu alishile mu Galili akobilikisha imbila nsuma yakwa Lesa. ¹⁵Alilandile ati, "Inshita ilifikilishiwe no bufumu bwakwa Lesa bulipaleme. Lapileni no kusumina imbila nsuma." ¹⁶Ulo ali akoenda lubali lwa bamba wa Galili, alimwene Simone na Andrea munyina wakwa Simone bakoposa isumbu muli bamba, pantu bali balondo besabi. ¹⁷Yesu alilandile kuli bena ati, "Iseni, nkonkeni, kabili nkomilenga ukuba abalondo ba bantu." ¹⁸Elo apopenefye balishiile amasumbu no kumukonka. ¹⁹Ulo Yesu aendelelako akatalamukila, alimwene Yakobo umwana mwaume wakwa Sebede na Yohane munyina; bali mubwato bakolunda amasumbu. ²⁰Alibetile nabo balishiile wishibo Sebede mubwato pamo na babomfi ba malipilo, kabili balimukonkele. ²¹Nolu baliishile mu Kapernamu, kabili pe Sabata, Yesu alile mu sunagoge no kusambilisha. ²²Bonse balisungwike pa kusambilisha kwakwe, pantu ali kubasambilisha kubati ni umo uukwete insambu kabili tali nga bakalemba. ²³Apopenefye umwaume mu sunagoge yabo uwakwete umupashi wakowela alipundile umusowa, ²⁴ukweba ati, "Nindo tufwile ukucita na webo, Yesu wa ku Nasareti? Bushe wishile mukutonaula? Ndikwishibile, niwe Uwashila wakwa Lesa!" ²⁵Yesu alikalipile icibanda no kulanda ati, "Ikala tondolo no kufuma muli ena!" ²⁶Umupashi wakukowela walimuposele panshi no kufuma muli ena ninshi akolila mwi shiwi lya kupunda. ²⁷Abantu bonse balisungwike, eco baliipushenye cila umo, "Nindo iyi? Ukusambilisha kupya ukwa nsambu! Alapikimuna ne mipashi iya kukowela nayo ikomubela!" ²⁸Ilyashi lyapali ena lyalile konse mu citungu conse ica Galili. ²⁹Panuma ya kufuma Mu sunagoge, balishile mung'anda yakwa Simone na Andrea, pamo na Yakobo na Yohane. ³⁰Nomba nafyala kwa Simone alisendeme nalwala impepo, kabili balyebele Yesu palwa ena. ³¹Eco alishile, alimwikete pa kuboko, no kumwimya; ne mpepo yalimushile, kabili alitampile ukubapyungila. ³²Cilya cine cungulo panuma akasuba kawa, baliletele kuli ena bonse abalwele na baiketwe ne ngulu. ³³Umusumba onse walikolongene pa mwinshi. ³⁴Aliposeshe abalwele abengi amalwele ayalekana-lekana no kutamfya ingulu ishingile, lelo tasuminishe ingulu ukulanda pantu shali mwishibile. ³⁵Alyalamukile bwangu, ulo kucili kulifitile; alifumine no kuya mu ncende iya tondolo na kulya alipepele. ³⁶Simone nabo abali nankwe balimufwaile. ³⁷Balimusangile no kulanda kuli ena ati, "Bonse bakomufwaya." ³⁸Alilandile ati, "Natulekuyako kumbi, ukuya mu mishi ishingulwike, pakwebati ningaya kushimikila noko kwine. Eco njishile kuno kunse." ³⁹Alipitile mu Galili monse, ukulashimikila muma sunagoge yabo no kulatamfya ingulu. ⁴⁰Uwa fibashi alishile kuli ena. Alikumupapata; alifukeme no kulanda kuli ena ati, "Umfwa mukofwaya, kuti mwansangulula." ⁴¹Pakwikatwa ne nkumbu, Yesu alitambalike ukuboko no kumwikata, ukulanda kuli ena ati, "Nkofwaya. Ba uwakusangululwa." ⁴²Palyapene ifibashi fyalimushile, kabili alisangulwilwe. ⁴³Yesu alimusopeshe no kumuleka alekuya. ⁴⁴Alilandile kuli ena ati, "Ushininkishe ukwebati tawebeleko uuli onse, lelo kabuye, uyekuilanga kuli shimaepo, kabili upele icabupe pa kusangululwa kobe ifyo Mose akonkomeshe, ngo bunte kuli bena." ⁴⁵Lelo alile kunse kabili alitendekele ukulacilanda palwalala no kulasabankanya icebo, apakalamba icakwebati Yesu taingila mu musumba palwalala lelo aikele mucende ishakufisama. Lelo abantu balikwisa kuli ena ukufuma muncende shonse.

2

¹Ulo abwelele ku Kapernahumu panuma ya nshiku shinono, calyumfwikile ukwebati ali pa ng'anda. ²Eco abengi balilongene tapalipo ne ncende, nangu ni pa mwinshi, kabili alilandile cebo kuli bena. ³Nolu abaume bamo balishile kuli ena abaletele umuntu uwali no bulebe; abantu bane eba musendele. ⁴Ulo basangile ati tekuti bapalame kuli ena pamulandu we bumba, balifumishopo umutenge uwali pamulu wakwa Yesu, kabili panuma yakwisula, baliponeshe ubutanda apali uwabulebe. ⁵Pakumona icicetekelo cabo, Yesu alilandile ku muntu wa bulebe ati, "We mwana mwaume, imembu shobe shaelelwa." ⁶Nomba bamo aba muli bakalemba balikele palya, kabili bali kutontonkenya mu mitima yabo, ⁷"Ninshi uyu muntu akolandila muli uyu musango? Akoponta! Nani engelela imembu kano Lesa fye eka?" ⁸Palyapene fye Yesu mu mupashi wakwe alishibile ifyo bali kutontonkanya munda shabo. Alibelele ati, "Nindo mukotontonkanishisha ifi mu mitima yenu?" ⁹Cindo cayangukapo, ukulanda ku muntu wa bulebe, 'Imembu shobe shaelelwa' nangula ukulanda ati, 'Ima, bula ubutanda bobo, no kwenda?' ¹⁰Lelo pakwebati mwingeshiba ati Umwana wa Muntu alikwata insambu pe

sonde ishakwelela imembu," Alilandile ku wa bulebe ati, ¹¹"Nakweba, ima, senda ubutanda bobbe, no kuya ku ng'anda yobe." ¹² Alimine apopene no kubula ubutanda, no kufuma mu ng'anda ku ntanshi ya bonse, icakwebati bonse balisungwiike no kupela ubukata kuli Lesa, kabili balilandile ati, "Tatwabala kufimonapo ifya musango uyu." ¹³ Alifumine nakabili no kuya ku mbali ya bamba, ne bumba lyonse lyalishile kuli ena, kabili ali basambilishe. ¹⁴ Lintu ali akopita, alimwene Lebi, umwana mwaume wakwa Alfeo alikele pe tenti lya kwa kasonkesha wa musonko no ku mweba ati, "Nkonka." Alimine no ku mukonka. ¹⁵ Yesu ali kwete ukulya mu ng'anda yakwa Lebi na bakasonkesha ba musonko abengi na babembu bonse balililile capamo nankwe na basambi bakwe, ico balifulile kabili bali mukonkele. ¹⁶ Ulo bakalemba, abo abali abaFarise, ba mwene ukwebati Yesu akolya na babembu na bakasonkesha wa musonko, balilandile ku basambi bakwe abati, "Nindo alila na bakasonkesha wa musonko na babembu?" ¹⁷ Ulo Yesu aumfwile ifi alibebele ati, "Abantu abali bwino mu mubili tabakabila shing'anga; kano fye abantu abalwala ebakabila umo. Nshaishile mukwita abalungami, lelo ababembu." ¹⁸ Nomba abasambi bakwa Yohane na ba baFarise bali bakofunga. Abantu bamo balishile no kulanda kuli ena ati, "Nindo abasambi bakwa Yohane na basambi ba baFarise bafungila, lelo abasambi benu tabafunga?" ¹⁹ Yesu alibaswiike ati, "Bushe abasangwa kubwina kuti bafunga lintu bacili na shibwina? Nga bacili bali na shibwina, tekuti bafunge iyo. ²⁰ Lelo inshiku shili mukwisa ulu shibwina akasendwa ukufuma pali bena, kabili muli isho nshiku, bakafunga. ²¹ Takuli nangu umo uukambika insalu iipya pa mwingila wa kale. Umfwa cibe fyo icikamba cikokakatukapo, icipya ukufuma pa cakale, kabili kukaba ukulepukisha icabipisha. ²² Takuli uwingabika umwangashi upya mu nsupa iyakale. Umfwa cikabe fyo umwangashi ukalepula insumpa na fyonse fibili umwangashi ne nsupa fikaloba. Lelo, umwangashi uupya ubikwa mu nsupa iipya. ²³ Pa bushiku bwe Sabata Yesu alipitile mu mabala ya ng'ano, na basambi bakwe balikutempaula imitwe ya ng'ano. ²⁴ AbaFarise bali mwebale ati, "Mona, nindo bakocitila ifintu ifitasuminishiwa mwifunde pa bushiku bwe Sabata?" ²⁵ Alibebele ati, "Tamwabelenga ifyo Dabidi acitile ulu ali mukukabila kabili ali ne nsala - ena na baume ali nabo - ²⁶ ifyo aingile mu ng'anda yakwa Lesa ulu Abiataru ali shima pepo mukalamba, no kulya umukate wa ceni, icitasuminishiwa mwifunde ukulya kuuli onse kano fye ba shima pepo, kabili alipeleko umo kubo ali nabo?" ²⁷ Yesu alilandile ati, "Isabata lyapangilwe umutundu wa muntunse, te mutundu wa muntunse wapangilwe Sabata. ²⁸ Eco, Umwana wa Muntu ni Shikulu, no we Sabata line."

3

¹ Nakabili Yesu alingile mu sunagoge, kabili mwalipo umwaume uwa cisansa cakulemana. ² Bamo abantu balimukulolekesha ukumona umfwa akomuposha pa bushiku bwe Sabata pakwebati bakwate apa ku mushinina. ³ Yesu alilandile ku mwaume uwakulemana icisansa ati, "Ima no kwiminina pakati ka bantu bonse." ⁴ Elo alandile ku bantu ati, "Bushe lifunde ukucita icabune pa bushiku bwe Sabata nangu ukucita icabubi; ukupususha umweo nangu ukwipaya?" Lelo balifye tondolo. ⁵ Elo aceba-ceba pali bena no bukali, kabili aliketwe ubulanda pakutalama kwa mitima yabo, kabili alilandile ku mwaume ati, "Tambulula ukuboko kobe." Ali kutambulwile, no kuboko kwakwe kwalipolele. ⁶ AbaFarise balifuminemo na palya pene balitendekele ukupangana na bena Herode ifyo bengamwipaya. ⁷ Elo Yesu, na basambi bakwe, baile kuli bamba, ne bumba lya bantu ilikalambam lyali mukonkele ukufuma ku Galili na ku Yudea ⁸ na ku Yerusalemu na ku Idumea no kucila Yodani no kushinguluka Turi na Sidone. Ulo baumfwile pa fintu alikucita, ibumba ilikalamba lyalishile kuli ena. ⁹ Alyebele abasambi bakwe uku mupekanishisha akabwato akanono pa mulandu we bumba, pakwebati ibumba limutitika. ¹⁰ Ico aliposeshe abengi, icakwebati bonse abakwete amalwele yakulekana lekana balifwaishe ukweba ati ba mwikatemo. ¹¹ Lyonse ulu imipashi yakukowela ya mumona, yalikuwonene panshi ku ntanshi yakwe no kulila, no kulanda ati, "Uli Mwana wakwa Lesa." ¹² Elo alishinkomesha cibi ukukana lenga eshibikwe. ¹³ Alile pa mulu wa lupili, kabili alikutila abo alikufwaya, nabo balile kuli ena. ¹⁴ Alisontelepo abe kumi na babili (abo ainikile abatumwa) pakwebati bengaba nankwe no kwebati enga batuma ukuya kubila imbila, ¹⁵ no kukwata insambu shakutamfya ingulu. ¹⁶ Alisontele abe kumi na babili: Simone, uyo apele ishina lya Petero, ¹⁷ Yakobo mwana mwaume wakwa Sebede, na Yohane munyina Yakobo, abo apele ishina Boanerge, emukutula, abana baume cibulukuto; ¹⁸ na Andrea, Filipi, Bartolomeo, Mateo, Toma, Yakobo umwana mwaume wakwa Alfeo, na Tadeo, Simone umwana Sealote, ¹⁹ na Yuda Iskariote, uwali nokwisa ku mufutuka. ²⁰ Elo abwelelemo ku nga'anda, ne bumba lyalilongene nakabili, icakwebati balililile no kulya nangufye mukate. ²¹ Ulo ulupwa lwakwe lwaumfwile palwa ico, balile ukuyakumusenda, pantu balandile ati, "Alipenene." ²² Bakalemba abafumine mu Yerusalemu balilandile ati, "aliminwe na Beelsebuli" kabili "Muli kateka wa ngulu emo alikutamfisha ingulu." ²³ Yesu alibakutile umwine no kubebela mu milumbe ati, "Bushe Satana kuti afumya shani Satana? ²⁴ Umfwa ubufumu bwayakanika ubwine, ubo bufumu tekuti bwiminine. ²⁵ Umfwa ing'anda yaakanikana iine yeka, iyo ing'anda tayakatale aiminina. ²⁶ Umfwa Satana aliimine umwine kabili alipatukene, tekuti eminine, lelo alishile kukulekelesha. ²⁷ Lelo takwingaba uwingegila mu ng'anda ya mwaume uwa kukosa no kwiba ifintu fyakwe ukwabula ukukakila umwaume wa kukosa pakubala lyena, nolu kuti atapa ing'anda yakwe. ²⁸ Icinene cine nkolanda kuli mweba, imembu sha bana baume ba bantu shonse shikelelwa, ukubikapofye ne miponto isho balanda, ²⁹ lelo uyo onse uupontela Mupashi wa Mushilo takatale abelelwa uluse, lelo ali uwashininwa no lubembu lwa muyayaya." ³⁰ Yesu alilandile ifi pantu balikulanda ati, "Alikwete umupashi wakukowela." ³¹ Elo banyina na bandume yakwe baishile no kwiminina panse. Balimutumine, abakuya kumukuta. ³² Ibumba lyalikele lilimushingulwike kabili balilandile kuli ena ati, "Banoko na bandume yobe na bankashi yobe bali panse, kabili bakokufwaya." ³³ Ali baswiike ati, "Bamayo na bandume yandi ni bani?" ³⁴ Aliloleshe pali abo abaikele balimushingulwike no kulanda ati, "Moneni, aba e bamayo na bandume yandi! ³⁵ Pantu uyo onse uucita ubufwayo bwa kwa Lesa, uyo muntu e ndume yandi, kabili nkashi, kabili e mayo."

¹Nakabili alitendekele ukusambilisha ku mbali ya bamba, ne bumba ilikalamba lyalikolongene ukumushinguluka. Nao alininine mu bwato ubwali pali bamba, kabili alikeleko mukati. Ibumba lyonse lyali ku cabu mu mbali ya bamba.

²Alibasambilishe ifintu ifingi mu milumbe, na mukusambilisha kwakwe, ifi efyo alandile kuli bena. ³"Kutikeni! Umulimi alimine alile kukutanda imbuto shakwe. ⁴Ulo atandile, shimo shaponene pa musebo, ne fyoni fyalishile no kushiminaula. ⁵Shimbi shaponene pa mushili wa nsakalabwe, palya tapali umushili uwingi apo pene shalisapwike, pantu tashakwete umushili wakushishika. ⁶Lelo ulo akasuba katulile, ifilimwa fyalifumbile, na pamulandu wa kukanakwata imishila, fyalyumine. ⁷Shimbi mbuto shaponene mu myunga. Imyunga yalikulile no kushitabilila, kabili tayatwele ifisabo. ⁸Shimbi mbuto shaponene pa mushili wabune no kutwale fisabo ifyakulile no kusanduluka no kutwala amakumi yatatu, amakumi mutanda, nefya myanda." ⁹Elo alandile ati, "Onse uwakwete amatwi yakutesha, nateshe!" ¹⁰Ulo Yesu ali eka, nabo abamushingulwike na bekumi babili balimwipwishe palwa milumbe. ¹¹Alilandile kuli bena ati, "Kuli mwebo kwalipelwa icankama ca bufumu bwa kwa Lesa. Lelo kuli abo ababa kunse, fyonse milumbe, ¹²pakwebati ulo bakololesha, ee bakololesha, lelo tabakomona, kabili pakwebati, ulo bakoumfwa, ee bakoumfwa, lelo tabakouluka, nga teifyo kuti babweluluka na Lesa kuti ababelela uluse." ¹³Alilandile kuli bena ati, "Bushe tamwilukile uyu mulumbe? "Nomba mukeluka shani imilumbe shonse?" ¹⁴Katanda atanda icebo. ¹⁵Aba ebali pa mbali ya musebo, apo icebo cibwalwa. Ulo baumfwa, Satana apo pene alesa no kusompola icebo icibyelwe muli bena. ¹⁶Neshi embuto shabyelwe mu mushili wa nsakalabwe; ni abo, ulo batesha icebo apopene bacipokelela ne nsansa. ¹⁷Lelo tabakwete imishila abene, lelo bashipikisha pa kashita akanono. Panuma ulo ubucushi no kupakaswa fyaima pa mulandu wa cebo, apopene bawa. ¹⁸Na shimbi nasho nisho shatandilwe mu myunga. Ni abo abomfwa icebo, ¹⁹lelo amalangulushi ya mu calo ne fyakubeleleka fya bunonshi ne fyakubeleleka fya fintu fimbi fyaingila no kufubalisha icebo, kabili cakana ukusanduluka. ²⁰Isho Ishatandilwe mu mushili wa bune ni abo abomfwa icebo, bacipokelela no kutwala ifisabo, amakumi yatatu, amakumi mutanda, nangu ifya miku mwanda. ²¹Yesu alilandile kuli bena ati, "Bushe mwalitala amutwala inyali mukati ka ng'anda no kukupikapo umuseke nangu mwifungu lya busanshi? Mulengisha no kubika pa cakutekapo. ²²Pantu takwaba icafisama icitacakeshibikwe, kabili takwaba ica fisama icitakamoneke pa lwalalala. ²³Umfwa onse alikwete amatwi yakutesha, nateshe!" ²⁴Alilandile kuli bena ati, "Kutikeni ku fyo mukoumfwa, pantu ku cipimo mubomfya eco bakamipiminako, kabili fikalundwako kuli mwebo. ²⁵Pantu uyo onse uwakwata, kuli ena kukapelelwapo na fimbi, na uyo onse uutakwata, na kantu akwata kakapokwa." ²⁶Nakabili alilandile ati, "Ubufumu bwa kwa Lesa bwaba kubati muntu uwabyele mbuto shakwe mu mushili. ²⁷Alisendeme ubushiku no kwalamuka akasuba, ne mbuto shilimenene no kukula, nangu ena taishibile fintu cali. ²⁸Umushili ulatwale ulubuto uwine weka: Pakubala umusonga, elo umutwe, elo ninseke shakoma mu mutwe. ²⁹Ulo icisabo capya, apopene ena atumako icikwakwa pantu ukusombola kulifikile." ³⁰Nakabili alilandile ati, "Ni kundo twingapalanya ubufumu bwa kwa Lesa, nangu mulumbe wakuba shani twingabomfya pa kucilondolola? ³¹Bwaba kubati luseke lwa lubanga, ulo, lintu lwabyalwa, lunono pa nseke sha pano nse. ³²Lelo, ulo lwabyalwa, lulakula no kusanguka lukalamba ukucila imiti yonse iya mwibala, kabili lulapatula imisambo iikalamba, pakwebati ne fyoni fya mu mulu kuti fyapikulamo ifinsa mu cintelelwe ca luko." ³³Ku milumbe iingi iyakuba nge yi alilandile cebo kuli bena, pamo nga fintu bali no kwiluka, ³⁴kabili talandile kuli bena ukwabula umulumbe. Lelo ulo ali eka, alilondolwele ifintu fyonse ku basambi bakwe. ³⁵Pali bulya bushiku, ulo icungulo cafikile, alilandile kuli bena ati, "Natulekuya kwishilya." ³⁶Eco balishile ibumba, balisendele Yesu, ifyo finefye ali, mu bwato. Kwailiko na yambi amato ayalikuya pamo nankwe. ³⁷Apo pene icipupu ca mwela icikalamba calimine, na mabimbi yalikuipama mu bwato bwapene bwisulemo amenshi. ³⁸Lelo Yesu ali kunuma ku cisolo ca bwato, alisendeme pa mulu wa musao. Balimubushishe, ukumweba ati, "Kasambilisha, bushe tamukosakamikwa ukwebati tuli mukufwa?" ³⁹Alishibwiwe, alikalipile icipupu, no kulanda kuli bamba ati, "Talala! Ba tondolo!" apo pene ne cipupu calilekele, kabili kwali ukukutumana ukukalamba. ⁴⁰Elo alandile kuli bena ati, "Nindo mwatinina? Bushe na nomba tamulakwata icicetekelo?" ⁴¹Baliketwe no mwenso ukalamba nganshi no kulanda kuli umo no munankwe ati, "Nga wa musango shani uyu, pantu ne cipupu na bamba fikomubela?"

¹Balishile kwi shilya lya bamba, ku citungu ica bena Gerase. ²Ulo Yesu alikupatuka mu bwato, apo pene umuntu uwali no mupashi wakukowela alishile kumukumanya ukufuma mu manda. ³Uyu muntu alikwikala mu manda. Takwali uwali na maka yakumukaka, nangu ni ku minyololo. ⁴Balemukakila inshita ishingira ku makoli ne minyololo. Aliputawile minyololo na makoli yakwe lyalifunaike. Takwali uwali na maka ya kumwansha. ⁵Cila bushiku na kasuba mu manda na mu mpili alikupunda no kuicekaula umwine na mabwe yakutwa. ⁶Ulo amwene Yesu akatalamukila, alibutukile kuli ena no kufukama kuli ena. ⁷Alipundile ne shiwi likalamba ati, "Nindo mfwiwe ukucita na mwebo, mwe Yesu, Umwana wakwa Lesa Wapulamo? Nkomipapata ukupitila muli Lesa umwine, mwincusha." ⁸Pantu alikulanda kuli ena ati, "Fuma mu muntu, webo we mupashi wakukowela." ⁹Alimwipwishe ati, "Niwe nani ishina?" Alimwaswikile ati, "Ishina lyandi nine mulalo, pantu tuli bengi." ¹⁰Alimupapatile nakabili na kabili ukukana itamfya mu citungu cilya. ¹¹Nomba umukuni wa nkumba ukalamba walikulya ukolya pa lupili, ¹²kabili balimupapatile, ukulanda ati, "Tutumeni mu nkumba; natwingile muli shena." ¹³Eco alishisuminishe, imipashi iyakukowela yalifumine no kwingila mu nkumba, no mukuni walitentemukile pa mutelemuko wa lupili ukuya muli bamba, ne nkumba nalimo amakana yabili shalinwinine muli bamba. ¹⁴Elo abo abalikulisha inkumba balibutukile no kuyakulanda pa fyacitikile mu musumba na mu mitanda, eco

abantu balile mukumona ifyacitikile. ¹⁵Elo baishile kuli Yesu no kumona umuntu uwali ne mipashi yakukowela, uyo uwaiketwe ne mipashi ya bu mulalo, alikele palya, alifwele kabili alibwelele mubutuntulu; kabili bali no mwenso. ¹⁶Abo abamweneko pafya citikile ku muntu uwaiketwe ne ngulu balibelele pali ifi fine mukushika, kabili balibelele na palwa nkumba. ¹⁷Elo batendeke ukumupapata ukufuma ku citungu cabo. ¹⁸Ulo alikupatama mu bwato, umuntu uwa iketwe ne ngulu ali mupapatile ukweba ati engaba nankwe. ¹⁹Lelo Yesu tamusuminishe, alimwebele ati, "Kabuye ku ng'anda yobe na ku bantu bobbe no kubeba ifyo Shikulu akucitila, nefyo akulanga uluse." ²⁰Eco alile kabili alitendekele ukubila mu Dekapoli ifintu ifikulu ifyo Yesu amucitile, na bonse balisungwiwe. ²¹Nomba ulo Yesu ayabuka nakabili kwishilya mu bwato, ne bumba ilikalamba lyalimushingulwiwe, ninshi acili mululamba lwa bamba. ²²Elo na umo uwa mubakalamba ba mu sunagoge alishile ishina lyakwe ni Yairo, kabili ulo amumwene, aliwile pa nkasa shakwe. ²³Alimupapatile kabili nakabili, akolanda ati, "Umwana wandi umunono umwanakashi ali mupepi no kumfwa. Namupapata, iseni mubike ndupi shenu pali ena ukwebati apole kabili abe no mweo." ²⁴Eco alile nankwe, ne bumba ilikalamba lyalimukonkele no kutitikana ukumushinguluka. ²⁵Nomba palya pali namayo uwalikusuma umulopa pa myaka ikumi na ibili. ²⁶Aliculile sana ukufuma kuli ba shing'anga no kuposa fyonse ifyo akwete, lelo mucifulo cakwebati omfweko bwino fyalikwilakofye pantashi. ²⁷Ulo aumfwile ilyashi palwa kwa Yesu, alishile kunuma mwi bumba no kwikata ku nsalu yakwe. ²⁸Pantu alilandile ati, "Umfwa naikata fye insalu shakwe, nkopola." ²⁹Ulo amwikete, apopene ukusuma kwa mulopa wakwe kwalilekele, kabili alyumfwile na mu mubili wakwe ukweba ati alyundepwe kubulwele bwakwe. ³⁰Yesu apopene alilukulike mu mwine ukweba ati amaka na yafumamo muli ena, alipilibwiwe mwi bumba no kulanda ati, "Uunkumishe ni nani?" ³¹Na basamba bakwe balilandile kuli ena, "Muli mwene bumba likomititikisha, kabili mukolanda ati, 'Ninani unjikete?'" ³²Lelo Yesu alilolekeshe amone uucitele ici. ³³Umwanakashi, pakwishibe ifyamucitike, alitinine no kututuma. Alishile no kuwa panshi ku cinso cakwe kabili alimwebele cishinka conse. ³⁴Nao alilandile kuli ena ati, "We mwana umwananashi icitetekelo cobe cakuposha. Kabuye umutende kabili uposhiwe ukufuma ku bulwele bobbe." ³⁵Ulo ali akolanda, abantu bamo balishile ukufuma ku ntungulushi iya mu sunagoge, no kulanda ati, "Umwana obe umwanakashi alifwile. Nindo ukotwalilila ukucusha kasambilisha?" ³⁶Lelo ulo Yesu aumfwile ilyashi ilyalandikwe, alilandile ku ntungulushi ya mu sunagoge ati, "Witina. Cetekela fye." ³⁷Tasuminishe nangu umo ukumukonka kanofye Petero, Yakobo na Yohane, munyina Yakobo. ³⁸Balishile ku ng'anda ya ntungulushi ya mu sunagoge no kumona abantu kulya bali bakopanga icongo saana, bali bakolila no kulosha. ³⁹Ulo aingile mu ng'anda, alilandile kuli bena ati, "Nindo mufuilwe kabili nindo mukolila? Umwana tafwile alelefye." ⁴⁰Balitendeke ukumutumfya. Lelo alibafumishe bonse panse no kubula wishi wa mwana na nyina nabo abali nankwe, kabili alingile umo umwali umwana. ⁴¹Alibulile ukuboko kwa mwana no kulanda kuli ena ati, "Talita Kumi!" icikopilibula ati, "We mukashana, Nalanda kuli weba, ima." ⁴²Apopene umwana alimine no kwenda (alifye ne myaka ikumi na ibili). Balipeshiwe amano no kupapushiwa saana. ⁴³Alibakonkomeshe ukwebati peba uwakwishiba pali ici. Elo alibelele ukumupelako ifyakulya.

6

¹Alile ukufuma kulya no kuya ku mushi kwabo, na basambi bakwe balimukonkele. ²Ulo ubushiku bwe Sabata bwafikile, alisambilishe mu sunagoge. Abantu abengi balimumfwile kabili balisungukile. Balilandile ati, "Nikwi afumya aya masambilisho?" "Mano nshi ayapelwa kuli ena?" "Fisungusho nshi ifi akocita ne minwe yakwe?" ³Bushe uyu tali kapala wa mbao, umwana mwaume wakwa Maria kabili munyina wakwa Yakobo na Yose na Yuda na Simone? Bushe ba nkashi yakwe tatwaba nabo kuno?" Balikalifiwe na Yesu. ⁴Nolu Yesu alilandile kuli bena ati, "Kasesema tabulwa mucinshi, kano fye umo afyalilwe na kuli balupwa lwakwe na ba ng'anda yakwe." ⁵Tacitile ifisungusho fimbi, kanofye ukubika indupi pa bantu abanono abalwele no kubaposha. ⁶Alisungwiwe pakubulwa ukucetekela kwabo. Nolu alile akoshinguluka mumishi kukusambilisha. ⁷Nolu alikutile abekumi na babili no kubatuma babili babili, kabili alibapele nsambu pa mipashi ya kukowela, ⁸kabili aliba konkomeshe ukukana piita nangu cimo palwendo lwabo, kanofye inkonto - umukate iyo, icola iyo, no lupiya iyo mu mishipi yabo - ⁹kanofye ukufwala indyato, no kukana fwala amalaya yabili. ¹⁰Alilandile kuli bena ati, "Lyonse ulo mwaingila mung'anda, mukalekwikalilila mpakafye mukafumeko no kuya. ¹¹Umfwa umushi uuli onse taumisengele nangu ukukutika kuli mweba, ulo mwafumako ku ncende iyo, mukunte ulukungu ku makasa yenu ngo bunte kuli bena." ¹²Balile no kubilikisha ukwebati abantu bafwile ukulapila. ¹³Balitamfishe ingulu ishing, no kusuba abalwele abengi na mafuta no ku baposha. ¹⁴Imfumu Herode yalyumfwile ifi, pantu ishina lyakwa Yesu lyalilumbwiwe. Bamo balikulanda abati, "Yohane kabatisha alibukile kubafwa, kabili emulandu wine aya amaka ya fisungusho yakobombela muli ena." ¹⁵Bambi balikulanda ati, "Ni Eliya." Bambi nabo abati, "Ni kasesema, kubati ni umo pali bakasesema ba nshita ya kale." ¹⁶Lelo ulo Herode aumfwile ifi alilandile ati; "Yohane, untu naputwile umutwe alibukile." ¹⁷Pantu Herod alitumine abakuya kwikata Yohane no ku muposa mucifungo pamulandu wakwa Herodia (Umukashi wakwa Filipo munyina), Pamulandu wakwebati alimupile. ¹⁸Pantu Yohane alyebele Herode ati, "Tacilungeme weba ukupa umukashi wakwa ndume yobe." ¹⁹Lelo Herodia alimufuilwe kabili alikufwaya ukumwipaya; lelo alifililwe, ²⁰pantu Herode alikutina Yohane; alishibile ukwebati ali mulungami kabili muntu washila, kabili alimusungile bwino. Ukukutika kuli ena alepeshiwa mano nganshi, lelo alikumumfwa no kusekelela. ²¹Elo inshita iyayana yafikile ulo Herode alikusefya ubushiku bwakufyalwa kwakwe kabili alipangile umutebeto kubantu bakwe na bacilolo na bakalamba bafita ne ntungulushi shamu Galili. ²²Umwana mwanakashi wakwa Herodia alishile no kubacindila, kabili alitemwine Herode na beni bakwe, Imfumu yalilandile ku mukashana, "Lomba icili conse ico ukofwaya kuli nebo kabili nkokupela." ²³Alilapile kuli ena ukulanda ati, "Conse ico ukolomba kuli nebo, nkokupela ukufika nakuli citika wa bufuma bwandi." ²⁴Alifumine

panse no kuya kwipusha nyina ati, "Findo nkomulomba?" Nyina alilandile ati, "Umutwe wakwa Yohane kabatisha."

²⁵Apopene alibwekelelo ku mfumu, nokuya kulomba, ukwebati, nkofwaya mumpole, apapene, umutwe wakwa Yohane kabatisha pa nsani iya mbao.²⁶Nangula ici casakamike imfumu, yalifilile ukukana ico alombe pantu yalilapile mulapo na pamulandu wa beni baiko.²⁷Eco imfumu yalitumine umushilika waiko ukufuma pali bakalinda no kumukonkomensha ukwebati kaletu umutwe wakwa Yohane. Umushilika aliile nokuya kumuputula umutwe mucifungo.²⁸Aliletele umutwe pa nsani iya kuselelela iya mbao no kuupela ku mukashana nao umukashana alipele nyina.²⁹Ulo abasambi bakwe baumfwile balishile no kwisa kusenda icitumbi cakwe, nokuya kushika mu nshishi.³⁰Abatumwa balishile capamo na Yesu no kumulondolwela fyonse ifyo bacitile no kusambilisha.³¹Nolu alilandile kuli bena ati, "Iseni natulekuya akatalamukila ku ncende iishingemeko no kutushako." Pantu abengi balikwisa no kuya, kabili tabakwetepo ne nshita ya kulya.³²Eco balile abene beka mu bwato ku ncende iya katalala.³³Lelo balibamwene uko balikuya na bengi balibeshibile, kabili balibutukile capamo pa nkasa ukufuma mu mishi shonse, no kubatangilila no kuyakufika bwangu pali bena.³⁴Ulo bafikile ku mbali ya mu mana, alimwene ibumba ilikalamba kabili alibakwatile inkumbu pantu balikumoneka kubati ni mpanga ishakubula kacema. Eco alitendeke ukubasambilisha ifintu ifingi.³⁵Ulo bwailile, abasambi bakwe balishile kuli ena no kulanda ati, "Ino ni ncende ya matololo kabili ne nshita ilipwile."³⁶Batamfyeni balekuya mu ncende sha mupepi na mumishi nokuya kushitako ifilyo fyakwisakulya abene."³⁷Lelo alibasukile no kulanda kuli bena ati, "Mwebo bapeleni ifilyo." Balilandile kuli ena ati, "Bushe tuye kushita imikate palupiya lwa myanda ibili no kubapela balye?"³⁸Alilandile kuli bena ati, "Mukwete imikate inga? Kabuyeni no kumona." Ulo bailekumona balilandile ati, "Imikate isano ne sabi libili."³⁹Alikonkomeshe abantu bonse ukwikala mu mabumba panshi pafyeni fya katapa-katapa.⁴⁰Balikele panshi mu mabumba ya myanda na mu makumi yasano.⁴¹Alibulile imikate isano ne sabi libili, kabili alipunamine mu mulu alipalile no kumokaula umukate no kupela ku basambi ukuteyanya ku bantu. Kabili alishile kwakanya isabi libili kuli bonse.⁴²Bonse balilile mpaka baikuta.⁴³Balikushilepo utupimfya twa mikate, imiseke ikumi limo na ibili iyakwisula, no tupimfya twe sabi.⁴⁴Bali abaume amakana yasano abalile imikate.⁴⁵Palyapenefye alyebele abasambi bakwe ukupatama mu bwato no kutangilako ukuya kwishilya, ku Betsaida, elo alisalangenye ne bumba.⁴⁶Panuma abashile, alile ku lupili mu kupepa.⁴⁷Icungulo califikile, ninshi ubwato buli pakati ka bembu, kabili ena ali eka kululamba.⁴⁸Alimwene ukweba ati balikushomboka na mabimbi, pantu umwela walibemine. Nakalimo pansa yakulenga isano ubushiku alishile kuli bena, akoenda pali bembu, kabili alikufwaya ukubapitilila.⁴⁹Lelo ulu baishile kumumona akoenda pali bembu, balitontokenye ukwebati ali ciwa nokwisa kupunda,⁵⁰pantu balimumwene kabili balicushiwe. Palyapenefye alilandile kuli bena nokwisa kubeba ati, "Shipeni! Ninebo! Mwiba na mwendo!"⁵¹Alininine nabo mu bwato, no mwela walilekele ukupupa. Balisungukile umupwilapo.⁵²Pantu babulile ubwishibilo umo imikate yalolele. Lelo, imitima yabo yalikoesele.⁵³Ulo baabukile kwishilya, balifikile pa mpanga ya Genesarete kabili balikakile ubwato.⁵⁴Ulo bafumine mu bwato, abantu balimwishibe apo penefye,⁵⁵kabili balibutukile mu citungu conse no kutendeka ukulaleta abalwele pa matanda yabo conse uko balikumfwa ukwebati eko ali.⁵⁶Lyonse ulu aleingila mu mishi, nangu mu misumba, nangu mu calo, balikubika abalwele mufisankano. Balimupapatile ukwebati abasuminishe ukwikata ku mpela yelaya lyakwe, kabili bonsefye abali kumwikata balipolele.

7

¹Aba Farise na bamo bakalemba abafumine ku Yerusalemu bali musingululwike.²Balimwene ukwebati bamo abasambi bakwe balilile umukate ku minwe iyabula ukusangululwa, iya kubula ukusambako.³(Ico abaFarise na baYuda bonse tabalikulya ukwabula ukusamba ku minwe bwino - bwino, pantu cali cishilano ukufuma ku bakalamba babo.⁴Ulo abaFarise bafuma pa cisankano, tabalikulya kanofye baisambika, kabili balikatilila ku fintu ifingi ifyo bapokelela, pamo nga ukusuka inkombo, imitondo, ifipe fya mikuba, na fyonse ifyo bali kulilapo.)⁵AbaFarise na bakalemba balipwishe Yesu ati, "Nindo abasambi bobe tabakoendela umwabela icishilano ca bakalamba, lelo bena bakolya umukate wabo ne minwe yakubula ukusangululwa?"⁶Lelo alibebele ati, "Esaya kasesema aliseseme bwino pali mwebo ba bumbimunda. Ngefyo calembwa ukwebati, 'Aba bantu balincindikilefye ne milomo yabo, lelo imitima yabo yaba ukutali na nebo.⁷Banshinshimuna apafye, ukusambilisha ifipope fya bantu kubati efintu basuminamo."⁸Mukosha amafunde yakwa Lesa no kukonka ifishilano fya bantu."⁹Nakabili ali bebele ati, "Mukana shani bwino amafunde yakwa Lesa ukwebati mwingabaka ifishilano fyenu!"¹⁰Pantu Mose alilandile ati, 'Cindika wiso na noko,' Kabili, 'Noyo uulanda ifyabubi pali wishi na nyina icine cinefye ali no kufwa.'¹¹Lelo mulanda ukwebati, 'Umfwa umuntu alanda kuli wishi na nyina ati, "Ico conse ica bwafwilisho ubo mwapokelele kuli nebo ni Korbani," (emukulanda ati, 'Cabupe'),¹²ninshi tamukomusuminisha ukucita icili conse kuli wishi nangu kuli nyina.¹³Mukolenga icebo cakwa Lesa ukuba ica fye ku mulandu wa cishilano cenu ico mwashilana. Na fimbi fintu ifyakupalana ifyo mucita."¹⁴Alikutile ibumba nakabili no kulanda kuli bena ati, "Kutikeni kuli nebo, mwebo bonse, no kwiluka."¹⁵Tapali nangu cimo icifuma kunse ya muntu icinga mukowesha umfwa caingila muli ena. Nifilya fifuma mu muntu efimukowesha."¹⁶Umuntu uuli na matwi yakumfwa na omfwe.¹⁷Nomba ulu Yesu ashile ibumba no kwingila mu ng'anda, abasambi bakwe balimwipwishe palwa mulumbe.¹⁸Yesu alilandile ati, "Bushe na mwebo mucili tamulailuka? Bushe tamwaishiba ukwebati icingila mu mubili wa muntu ukufuma kunse tekuti cimukowesha,¹⁹pantu tekuti cingile mu mutima wakwe, lelo fiya munda no kufuma kunse?" Na pali ukukulanda Yesu alilengele ifilyo fyonse ukusanguluka.²⁰Alilandile ati, "Nifyo ififuma mu muntu efimukowesha."²¹Pantu ukufuma mukati ka muntu, ukufuma mu mutima, emufuma amatontonkanyo ya kubipa, ubulalelale, ukwiba, ukwipaya,²²ubucende, ulunkumbwa, ububifi, ubucenjeshi, bucilende, umufimbila, imiponto, amataki, ubuwelewele.²³Ifya bubifi ifi fyonse

ffuma mukati, kabili efikowesha umuntu."²⁴ Alimine ukufuma kulya no kuya ku ncende ya Turi na Sidone. Kulya alile mu ng'anda, kabili talikufwaya nangu umo ukwishiba uko ali, lelo tekuti afisame.²⁵ Lelo apopenefye umwanakashi untu akana kakwe akanakashi kali no mupashi uwakukowela aumfwile palwa ena kabili alishile no kwisakuwa pa nkasa shakwe.²⁶ Nomba uyu mwanakashi ali mu Hela, uwa muluko lwa bena Surofoinike. Alimupapatile ukutamfya ingulu ukufuma mu mwana wakwe umwanakashi.²⁷ Alilandile kuli ena ati, "Leka abana babale balye. Pantu tacayana ukusenda icakulya ca bana no kuposela imbwa."²⁸ Lelo alyaswiwe no kulanda kuli ena ati, "Ee, mwe Shikulu, ne mbwa shine shilalyako ubufungau ubukoponya bana mwisamba lye tebulo."²⁹ Alilandile kuli ena ati, "Pamulandu wafyo wa landa, uli muntungwa kabiye. Ingulu ilifumine mu mwana obe umwanakashi,"³⁰ Alibwelelemo ku ng'anda yakwe no kuyakusanga umwana alilele pa busanshi, ne ngulu ilile.³¹ Nolu alifumineko nakabili ku citungu ca Turi, no kuya kupita mu Sidone ukuya kuli bema wa Galili no kufika ku citungu ca Dekapoli.³² Baliletele kuli ena umo uwali nkoma matwi kabili ali cimeme talikulanda bwino, kabili balimupapatile ukutambalika ukuboko kwakwe pali ena.³³ Nolu balimusendele pa mbali ukumufumya pe bumba mu bumfisolu, alibikile utukumo twakwe mu matwi yakwe, nakabili alisakile amate no kwikata ululimi lwakwe.³⁴ Nolu alipunamine mu mulu, no kubwesa icefu, no kulanda kuli ena ati, "Efifata," icikolola mukweba ati, "Isuka!"³⁵ Apopenefye amatwi yakwe yalikomonweke, na kalimba ka lulimi lwakwe kaliputwiwe, kabili alyambile ukulanda bwino.³⁶ Yesu alibakenye ukwebako umuntu nelyo umo. Lelo ulu alikubakonkomesha, elo bacililemo ukulisabankanya.³⁷ Balipapwike sana, ukulanda ati, "Alicitilefye ifintu fyonse bwino. Kabili akolenga na nkomya ukumfwa ne cimeme ukulanda."

8

¹Muli shilya nshiku, kwali kabili ibumba ilikalamba, kabili tabakwete filyo ifili fyonse. Yesu alikutile abasambi bakwe no kulanda kuli bena ati, ²"Ndikwatile bumba inkumbu pantu inshiku shitatu balitwalilile ukuba nanebo kabili ukwabula ukulya nangu cimo. ³Umfwa nabeba ukuya ku mayanda yabo ukwabula ukulya, kuti bafwa ulushile munshila. Bamo bafumine ukutali." ⁴Abasambi bakwe balimwasukile ati, "Nipi tukosanga imikate iingi muno mu matololo ifya kuti aba bonse abantu bekute?"⁵ Alibepwishe ati, "Bushe mikate inga mukwete?" Balilandile ati, "Cinelubali." ⁶Alyebele ibumba ukwikala panshi. Alibulile imikate cinelubali, no kutasha, kabili aliimokawile. Alipele ku basambi bakwe ukupekanya, kabili balipele kwi bumba. ⁷Kabili balikwete utusabi utunono, na panuma ya kutasha, alikonkomeshe abasambi ukubapela nefi fine. ⁸Balilile kabili balikwite, kabili balikolanganike utupimfya utwashelepo, imiseke iikalamba cinelubali. ⁹Kwali abantu napamo amakana yane. Elo alibalekele baye. ¹⁰Napopenefye alipateme mu bwato na basambi bakwe, kabili baile mu citungu ca Dalmanuta. ¹¹Elo abafarise balifumine panse kabili balitendelekele ukutalikana nankwe. Balikufwaya icishibilo kuli ena icakufuma mu mulu, ku kumwesa. ¹²Alibweshe icefu mu mutima wakwe nokweba ati, "Nindo ino nkulo iko fwaila icishibilo? Mucine nkolanda kuli mwebo ati, inkulo ino tayakapelwe icishibilo." ¹³Nolu alibashile, alininine mu bwato nakabili, no kuya kwishilya. ¹⁴Nomba abasambi balilabile ukusenda imikate. Tabakwete umukate ukucila pali umo mu bwato. ¹⁵Alibakonkomeshe, ukulanda ati, "Cenjeleni ku citutumushi ca bafarise ne citutumushi ca kwa Herode." ¹⁶Abasambi balitalikene umo no munankwe pakukana kwata umukate. ¹⁷Ulo aishibefi, alibepwishe ati, "Nindo mukotalikanina ukweba ati tamukwete mukate? Bushe tamukomona nangu ukwiluka? Bushe mulikwete imitima iyakukosa?" ¹⁸Mulikwete amenso, bushe tamukomona? Mulikwete amatwi, bushe tamukoumfwa? Bushe tamukoibukisha? ¹⁹Ulo na mokawile imikate isano ku bantu amakana yasano, Bushe miseke inga mwalonganike iyaisulamo imikate?" Balilandile kuli ena ati, "Ikumi na ibili." ²⁰"Ulo na mokawile imikate cinelubali kuba makana yane, bushe miseke inga iyabufungau iyo mwalonganike?" Balimwebele ati, "Cinelubali." ²¹Alilandile ati, "Bushe na nomba tamukoiluka?" ²²Balifikile ku Betsaida. Abantu kulya baliletele umuntu uwali mpofu kabili balipapete Yesu ukumwikata. ²³Yesu alikete umuntu wali mpofu pa kuboko noku mutwala kunse ya mushi. Ulo asakille amate mu menso yakwe no kubika indupi shakwe pali ena, alimwipwishe ati, "Bushe ukomonapo ifili fyonse?" ²⁴Aliloleshe, nokulanda ati, "Nkomona abantu abakomoneka kubati fimuti fikoenda." ²⁵Elo nakabili alibikile indupi shakwe pa menso yakwe, no muntu aliswile amenso yakwe, ukumona kwakwe kwalibwelelepo, kabili alimwenekeshe ifintu bwino. ²⁶Yesu alimulekele ukuya ku mwabo no kumweba ati, "Wiingila mu mushi." ²⁷Yesu alifumine na basambi bakwe ukuya mu mishi ya mu Kaisarea Filipi. Na mu nshila alipwishe abasambi bakwe, "Bushe abantu beba ati ninebo nani?" ²⁸Nabo balimwaswiwe abati, "Yohane kabatisha. Bambi nabo ati, 'Eliya,' na bambi, 'Umo uwa muli bakasesema.'" ²⁹Alibepwishe ati, "Lelo mwebo mweba ati ninebo nani?" Petero alimwebele ati, "Nimwe Kristu." ³⁰Yesu alibasokele ukukana eba umuntu nangu umo palwa ena. ³¹Alitendeleke ukubasambilisha ati Umwana wa Muntu alingile ukucula mu fintu ifingi, no kusulwa ku bakalamba na bashimapepo bakalamba naba kalemba, kabili akepaiwa, na panuma ya nshiku shitatu akabuka. ³²Alilandile palwa mbila palwalala. Nolu Petero alimusendele pambali no kutendeka ukumukalipila. ³³Nomba Yesu alipilibukile no kulolesha pa basambi bakwe kabili alikalipile Petero nokulanda ati, "Kabiye kunuma yandi, Satana! Taukobika amano yobe pa fintu fyakwa Lesa, lelo pa fya buntunse." ³⁴Elo akutile ibumba na basambi bakwe capamo, no kubeba ati, "Umfwa umo akofwaya ukunkonka, afwile ukuikana umwine, asende icapinda cakwe no kunkonka." ³⁵Pantu onse uukofwaya ukupususha umweo wakwe akaulofya, lelo onse uulofya umweo wakwe pamulandu wa ine na pa mbila nsuma akaupususha. ³⁶Bunonshi ndo buli mu muntu ukunonka icalo conse no kulofya umweo wakwe? ³⁷Cindo umuntu engapela mukukabushanya no mweo wakwe? ³⁸Onse uungumfwila insoni ne fyebo fyandi muli ino nkulo ya bucende no lubembu, Umwana wa Muntu akamubela insoni ulu akabwela mubukata bwa kwa Wishi pamo na bamalaika abamushilo."

¹Alilandile kuli bena ati, "Mucine nkomweba nati, palipo bamo pali mwebo mwebemine pano abasha kasonde imfwa ilyo tabalamona ubufumu bwakwa Lesa bukoisa na maka. ²Awe ulo papitile inshiku mutanda, Yesu alisendele Petero na Yohane na Yakobo no kunina nabo pa lupili ulutali, ku mbali beka. Nolu alyalwike pa cinso cabo, ³Ifyakufwala fyakwe fyalyalwike, ifyakubuta tutu, ukubutisha ukucila ifyo ulubuto lwa pano isonde lwinga butisha. ⁴Nolu Eliya na Mose balimonekele kuli bena, kabili balikulanda na Yesu. ⁵Na Petero alilandile kuli Yesu ati, "Rabi, cabune fwebo ukuba pano, eco kanshi tulekeni tukulepo imitanda itatu umo wenu, umo wakwa Mose, na umo wakwa Eliya." ⁶(Pantu taishibe icakulanda, ico balitine nganshi.) ⁷Kwalishile ikumbi no ku bafimba. Nolu ishiwi lyalifumine mwi kumbi likotila aliti, "Uyu e Mwana wandi uwatemwikwa. Mulekumumfwila." ⁸Mukupumikisha, ulo bacebwike, tabamwenepo nangu umo uwali nabo, lelo Yesu eka. ⁹Ulo balikutentemuko lupili, alibakonkomeshe ukutalondolwelako umuntu nangu umo ifyo bamwene kano fye ulo Mwana wa muntu akema ku bakufwa. ¹⁰Eco balisungile ifyebo ifi pakati kabo, lelo balikulanshanya abene beka umo "ukubuka kubakufwa" kwingalola. ¹¹Balimwipwishe ati, "Nindo bakalemba balandile ati Eliya afwile ukubalilapo ukwisa?" ¹²Na ena alandile kuli bena ati, kwena Eliya ewa kubalilapo ukwisa mukubweseshapo ifintu fyonse. Nindo fyalembelwe ati Umwana wa Muntu ali no kucula mu fintu fingi no kusulwa? ¹³Lelo nkolanda kuli mwebo ati, "Eliya aliisa, kabili balicitile kuli ena fyonse ifyo batemenwe, ngefyo calembelwe pali ena." ¹⁴Ulo bafikile ku basambi, balimwene ibumba lya bantu ilikalamba, lilibashingulwike, na ba kalemba balikutalikana nabo. ¹⁵Kabili apo penefye bamwene Yesu, ibumba lyonse lyalipapile kabili balibutukile kuli ena balamusengelela. ¹⁶Alipwishe abasambi bakwe ati, "Nindo mukotalikanapo nabo?" ¹⁷Umo mwi bumba alimwasukile ati, "Kasambilisha, ndiletele umwana wandi umwaume kuli mwebo. Alikwata umupashi wa bucibulu. ¹⁸Ulamwikata kabili ulamufuntula panshi, no kumufumya amafulo kukanwa, alaisumanya na meno, kabili alakosa. Nacipusha abasambi benu ukweba ati ba ufumyemo, lelo balifililwe." ¹⁹Nao alibaswike ati, "Mwe nkulo iyakubula icicetekelo, nkekala nenu ukufika ku nshita ndo? Bushe nkashipikisha namwe ukufika lwisa? Muleteni kulinebo." ²⁰Balitwele umulumendo kuli ena. Ulo umupashi wa mwene Yesu, apopenefye walimulengele ukusamfula. Umulumendo aliponene panshi alafulukuta no kufumye pofu ku kanwa. ²¹Yesu aipwishe wishi ati, "Nililali apo ca mutendekele ukubefi?" wishi alilandile ati, "Ukufuma ku bwaice bwakwe. ²²Libili libili ulamuposa mu mulilo nangu mu menshi no kufwaya ukumonaula. Umfwa pali ifyo mwingacita, tubeleleniko uluse no kutwafwa." ²³Yesu alilandile kuli ena ati, "Nga wingacita? Ifintu fyonse kuti fyacitika kuli uyo uwacetekela." ²⁴Apopenefye wishi wa mwana epakubilikisha no kulanda ati, "Ndincetekele! ngafweni ukukana cetekela kwandi!" ²⁵Ulo Yesu amwene ibumba likobutukilako alikalipile umupashi wakukowela no kuweba ati, we mupashi wa bucibulu no wabu nkoma matwi, nokweba nati, "Fumamo muli ena, kabili wikabwekeshapo ukwingila muli ena nakabili." ²⁶Walipundile no kumusamfula umulumendo apakalamba kabili walifuminemo. Umulumendo amonekele kubati alifwile, eco abengi baebele ati, "Alifwile." ²⁷Lelo Yesu alimwikete kukuboko no kumwimya, no mulumendo alimine. ²⁸Ulo Yesu aingile mu ng'anda, abasambi bakwe balimwipwishe ku mbali ati, "Nindo fwebo twacifililwa ukuutamfya?" ²⁹Alilandile kuli bena ati, "Uwa musango uyu tekuti ufume ku kantu kambi iyoo, kanofye kwipepo." ³⁰Kabili ulo bafumineko kulya no kupita mu Galili. Talikufwaya nangu umo ukwishiba uko bali, ³¹pantu ali kusambilisha abasambi bakwe. Alilandile kuli bena ati, "Umwana wa Muntu akopelwa mu minwe ya bantu, kabili bali no ku mwipaya. Ulo ba mwipaya, panuma ya nshiku shitatu akabuka nakabili." ³²Lelo bena tabailwike pali aya mashiwi, kabili balitine ukumwipusha. ³³Nolu balifikile ku Kapernahumu. Panuma aingile mu ng'anda alibepwishe, "Nindo mwacilalashanya mu nshila?" ³⁴Lelo balifye tondolo. Pantu balikutalikana umo no munankwe ukweba ati umukulu ninani. ³⁵Ulo aikala panshi, alikutile abekumi na babili capamo no kulanda kuli bena ati, "Umfwa umo akofwaya ukuba uwa ntanshi, abe uwa kunuma pali bonse kabili umubomfi wa bonse." ³⁶Alibulile akana akanono noku keminika pakati kabo. Alikakumbatile mu maboko yakwe no kulanda kuli bena ati, ³⁷Uyo onse uwasekelela akana akakubefi ninshi nandi ansekelela, kabili uwa nsekelela tasekelele nebo lelo ni uyo uwa ntumine." ³⁸Yohane alilandile kuli ena ati, "Mwe kasambilisha, twalimwene umuntu akotamfya ingulu mwishina lyenu kabili twalimukenyeye, pantu tatukonka." ³⁹Lelo Yesu alyebele ati, "Mwimukanya, pantu takuli nangu umo uwingacita umulimo wa maka mwishina lyandi, kabili alande icabubi panuma. ⁴⁰Pantu uutakopinkana nafwebo ninshi ali kulubali lwesu. ⁴¹Pantu uwa mipela ulukombo lwa menshi ya kunwa mwi shina lyandi, pakuba abakwa Kristu, nkomweba icine cine ati, takalofye icilambu cakwe. ⁴²Uyo onse uwalenga umo uwa mutunono utwancetekela ukuipununa, camuwamina apakalamba ukumukobeka icimpelo icikalamba mu mukoshi no kumuposa muli bamba. ⁴³Umfwa ukuboko kobe kwakulenga ukuipununa, kuputuleko. Cawamina weba ukwingila mu mweo makunkutu ukucila ukukwata maboko yabili no kuposwa kumbo, mu mulilo uutashima. ⁴⁴Umfwo lukasa lobe lwakulenga ukuipununa, luputuleko, cawama weba ukwingila mu mweo uwakulemana ukucilo kuposwa kumbo uli na makasa yabili. ⁴⁵Umfwe liso lyobe lyakulenga ukuipununa, lilobolemo. Cawama weba ukwingila mu bufumu bwakwa Lesa ne linso limo ukucila ukuposwa kumbo uli na menso yabili, ⁴⁶uko imititi yabo taifwa, no mulilo taushima. ⁴⁷Pantu onse akalungwamo umulilo. ⁴⁸Umucele wa bune, lelo umfwa umucele wasunduka, winga lowa shani? Mukwate umucele muli mwebene, kabili mube aba mutende umo no munankwe."

10

¹Yesu alifumine pali ilya ncende no kuya ku citungu ca Yudea na kubushilya bwa nika ya Yordani, ne bumba lyalishile kuli ena nakabili. Alikubasambilisha nakambi, ifyo abebele ukucita ²Nolu abaFarise balishile kuli ena ku kumweshana no

kumwipusha ati, "Bushe calisuminishiwa umulume ukuleka umukashi wakwe?"³ Nao alibasukile ati, "Nindo Mose amikonkomeshe?"⁴ Balyasukile ati, "Mose alisuminishe umwaume ukulemba icitupa ca kulekaninapo no kumuleka alekuya."⁵ "Nipa mulandu wa bunkosa mitima yenu amulembele ili funde," efyo Yesu alandile kuli bena.⁶ "Lelo ukufuma fye ku kutendeka kwa bubumbo, 'Les a libalengele umwaume no mwanakashi.'⁷ Pamulandu wa ici umwaume akasha wishi na nyina no kulambatila ku mukashi wakwe,⁸ nabo babili bakaba umubili umo."⁹ Kanshi ico Les a bika pamo, mwileka umuntu alekanye."¹⁰ Ulo bali mung'anda, abasambi nakabili balipwishe pali ici.¹¹ Alilandile kuli bena ati, "Onse uwaleka umukashi wakwe no kupa umbi ninshi acita ubucende kuli ena."¹² Kabili umfwa mwanakashi aleka umulume wakwe no kupwa ku mwaume umbi, nao acita ubucende."¹³ Nolu baliletele abana abanono kuli ena pakwebati abekatepo, lelo abasambi bakwe balibakalipile.¹⁴ Lelo ulo Yesu amwene ifi, alifulilwe no kulanda kuli bena ati, "Leken abana abanono hese kuli nebo, mwibakanya, pantu ubufumu bwa kwa Les a bwaabo ababa kubati ni bena."¹⁵ Mucine nkomweba ati, onse uutakapokelele ubufumu bwa kwa Les a ngo mwana umunono mucine takengilemo."¹⁶ Nolu alibulile abana mu maboko yakwe kabili alibapalile ulo abikapo indupi shakwe pali bena."¹⁷ Ulo atendekele ulwendo, umwaume ali mubutukile no kumufukamina kabili alimwipushe ati, "Mwe Kasambilisha wa Bune, nindo ningacita pakweba ati mpyane umweo wa muyayaya?"¹⁸ Yesu alyebele ati, "Nindo ukonjitila ati uwa bune?" Takwaba wa bune kano Les a fye eka.¹⁹ Mwalishiba amafunde: 'Wilakwipaya, wicita ubucende, wilakwiba, wilakupela bukamboni bwabufi, wilakufinsha, cindika wiso na noko."²⁰ Uyu muntu alilandile ati, "Mwe kasambilisha, fyonse ifi ndabela ukutula ku bulumendo bwandu."²¹ Yesu alimuloleshe no ku mutemwa. Alilandile kuli ena ati, "Walibulisha icintu cimo. Ufwile ukushitisha fyonse ifyo wakwata no kupela ku balanda, kabili ukakwata ifyuma mu mulu. Elo wise kunkonka."²² Lelo pamulandu wa mashiwi aya alimonekele uwa bulanda nokuya uwalunguluka, pantu alikwete ifyuma ifingi.²³ Yesu alilolekeshe no kulanda ku basambi bakwe ati, "Ifyo caafya abafyuma ukwingila mu bufumu bwa kwa Les a!"²⁴ Abasambi balipapile pakumfwa ifyebo fyakwe. Lelo Yesu alilandile kuli bena nakabili ati, "Mwebana, Ifyo caafya ukwingila mu bufumu bwa kwa Les a!"²⁵ Cakwangukapo ingamali akupula mu linso lya nshindano ukucila umukankala ukwingila mu bufumu bwa kwa Les a."²⁶ Balipapile apakalamba nokulanda kuli cila umo na umo ati, "Ninshi nani uwinga pusuka?"²⁷ Yesu alibaloleshe no kulanda ati, "Ku bantu caliba icakukosa, lelo te kuli Les a. Pantu kuli Les a ifintu fyonse fyakwanguka."²⁸ Petero alitendekele ukulanda kuli ena ati, "Lolesheni, twalisha ifintu fyonse no kukonka mwebo."²⁹ Yesu alyaswikile ati, "Mucine nkolanda kuli mwebo, takuli uwasha ing'anda yakwe nangu ba ndume nangu ba nkashi nangu nyina nangu wishi nangu abana nangu ifisompe pamulandu wandi ne mbila nsuma"³⁰ uutakapokelele imiku umwanda umo mu nshita ino: Amayanda ne ndume ne nkashi na banyina na bana ne fisompe, pamo ne fya kupakaswa, na mu calo cikoisa, umweo wa muyayaya.³¹ Lelo abengi abantanshi ebakaba aba numa, na banuma bakaba abantanshi."³² Bali munshila bakoya ku Yerusalemu, na Yesu alibatangilile. Abasambi balisungukile, nabo abalikunkoka munuma balitinine. Elo Yesu asendele abekumi na babili ku mbali no kubeba ifikoisa ku mucitikila mu kashita akakopalama.³³ Moneni, "tukoya ku Yerusalemu, no Mwana wa Muntu akapelwa kuli bashimapepo mukalamba na bakalamba. Bakamupingwila ukufwa no kumupela ku bena Fyalo.³⁴ Bakamutumfya, ukumusakila amate, ukulopaula, no ku mwipaya. Lelo panuma ya nshiku shitatu akabuka."³⁵ Yakobo na Yohane, bamwana Sebede, balishile kuli ena no kulanda ati, "Mwe kasambilisha, tukofwaya mutucitileko ifyo tukomilomba."³⁶ Alilandile kuli bena ati, "Nindo mukofwaya nebo mucitile?"³⁷ Nabo balandile ati, "Tusuminisheni ukwikala nemwe mu bukata bwenu, umbi ku kuboko kwa kulyo na umbi ku kuso."³⁸ Lelo Yesu alibaswike ati, "Tamwishibile ifyo mukolomba. Bushe mwinga nwina mu lokombo nkanwinamo no kushipikisha mu lubatisho bakambatishamo?"³⁹ Bali mwaswike ati, "kuti twacite co." Yesu alibelele ati, "Ulukombo nkanwinamo mukanwinamo, no lubatisho bakambatishamo, mukabatishiwamo."⁴⁰ Lelo uwakwikala ku kuboko kwa kulyo kwandi nangu ku kuboko kwandi ukwa kuso tacili candi ukupela, lelo caabo abo baciteyanishisha."⁴¹ Ulo abasambi bambi ikumi baumfwile palwa ici, balitendeke ukufululwa Yakobo na Yohane.⁴² Yesu alibakutile ukwisa uko ali no kubeba ati, "Mwalishiba ifyo abo ababa bakateka pa bena Fyalo babanyantilila, na ba filolo ba pa mulu babomfya amaka pali bena."⁴³ Lelo tacakabe muli iyi nshila pali mwebo. Uyo onse uukofwaya abe umukulu pali mwebo afwile aba umubomfi wenu,⁴⁴ noyo onse uukofwaya ukuba uwa ntanshi afwile aba musha wa bonse."⁴⁵ Pantu Umwana wa Muntu taishile mukumupyungila, lelo mukupyunga, no kupela umweo wakwe bulilambo bwa bengi."⁴⁶ Balishile ku Yeriko. Ulo afumine ku Yeriko na basambi bakwe ne bumba ilikalamba, umwana mwaume wa kwa Timeo, Bartimeo, uwali impofu kalombalomba, alikele mu mbali ya musebo.⁴⁷ Ulo aumfwile ukweba ati ni Yesu umwina Nasarete, alitendeke ukupunda no kulanda ati, "Yesu, Mwana Dabidi, mbeleleni uluse!"⁴⁸ Abengi balikalipile umwaume mpofu, ukumweba ukutalala. Lelo alibilikishe ukucilapo, "Mwana Dabidi, mbeleleni uluse!"⁴⁹ Yesu aliminine no kukonkomesha ukumukuta. Balikutile mwaume mpofu, ukweba ati, "Shipa! Ima! Akokukuta."⁵⁰ Aliposele pa mbali ilaya lyakwe, alicilwike, kabili alishile kuli Yesu.⁵¹ Yesu alimwasukile no kweba ati, "Nindo ukofwaya nkucitile?" Impofu iyaume nayo yalyaswike ati, Raboni, nkofwaya ukumona."⁵² Nolu Yesu alilandile kuli ena ati, "Kabiye. Icicetekelo cobe cakuposha." Napopenefye alitendeke ukumona, kabili alimukonkele mu musebo.

11

¹Nomba ulo baishile ku Yerusalemu, balipaleme ku Betfate na ku Betani pa lupili lwa Miolife, kabili Yesu alitumine abasambi bakwe babili² kabili alibelele ati, "Kabiye ni mu mushi uuloleshenye na fwebo. Amukengilafye mulya, mukosanga umwana wa mpunda uusha ninwapo. Mu mukakule no ku muleta kuli nebo.³ Umfwa umo alande kuli mwebo ati, 'Nindo mukocitile fi?' mu mwebe ati, 'Shikulu ako mukabila kabili akobwesha mukwangufyanya.'"⁴ Balile no kuya kusanga umwana wa mpunda balimukakile pa mwinshi ku mbali ya musebo, kabili balimukakwile.⁵ Bamo abantu

baiminineno palya balilandile kuli bena ati, "Nindo mukocita, mukokakula umwana wa mpunda?"⁶ Balibelele ifyo Yesu alandile, na bantu balibalekele baya.⁷ Ekuleta umwana wa mpunda kuli Yesu kabili ba posele insalu shabo pa mwana wa mpunda, kabili alikelepo.⁸ Abantu abengi ba yanshike insalu shabo mu musebo, bambi nabo imisambo ya mabula basabile mu mpanga.⁹ Elo abamutangilile kabili na bashalile balibilikishe ati, "Hosana! Alipalwa uwishila mwi shina lya kwa Shikulu."¹⁰ Bwalipalwa ubufumu ubukoisa ubwa kwa Shifwe Dabidi! Hosana mu myulu iyakulepesha!"¹¹ Nolu Yesu alingile mu Yerusalemu no kuya mwi tempele kabili alilolekeshe pali fyonse. Nomba pamulandu wa kupwa kwa nshita, alile ku Betani pamo na bekumi na babili.¹² Ubushiku bwakonkelepo ulo balikuya ukufuma ku Betani, alyumfwile nsala.¹³ Pakumona icimuti ca mukunyu akatalamukila icakwete amabula, alileko no kumona umfwa kuti asangako icisabo ku cimuti, ulo afikile pa cimuti, asangile takuli nangu cimo kanofye amabula, pantu tayali ni nshita ya fisabo.¹⁴ Alilandile kuli cena ati, "takwakatale akuba nangu umo uukalyako kuli webo icisabo nakabili." Na basambi bakwe balyumfwile ci.¹⁵ balishile ku Yerusalemu, kabili alingile mwi tempele no kutendeka ukutamfya abalikushitisha na balikushita mwi tempele. Alipilibawile ne fintamba fya bakakabusha wa ndalama ne fipuna fya bakashitisha ba nkunda.¹⁶ Tasuminishe nangu umo ukwingisha icakushitisha mwi tempele.¹⁷ Alibasambilishe no kulanda ati, "Bushe tacalembwa ati, 'Ing'anda yandi iketwa ing'anda ya mapepo ku nko shonse"?¹⁸ Bashimapepo bakalamba na bakalemba balyumfwile ifyo alandile, kabili balifwailishe umusango benga mwipailamo. Ico balikumutina pantu ibumba lyonse lyalipapile ukusambilisha kwakwe.¹⁹ Ulo cali icungulo, balifumine mu musumba.²⁰ Ulo balikupita mu lucelo, balimwene umukunyu ulyumine ukufika na kumishila.²¹ Petero alibukishe no kulanda ati, "Rabi, loleshene! Umukunyu mwatipile ulyumine"²² Yesu alibaswike ati, "Kwateni icicetekelo muli Lesa.²³ Nkomyeba icine nati umfwa umo alanda ku lupili ulu ati, 'Ima no kuiposa muli bamba,' kabili umfwa takotwishika mu mutima lelo asumina ukwebati ifyo alandile fikocitika, na Lesa akacita ifyo fine.²⁴ Eco nkomweba nati: Fyonse ifyo mwapepa no kulomba, sumineni ukwebati mulipokelele, kabili fikaba fyenu.²⁵ Ulo mwaiminina no kupepa, mufwile ukwelela conse mukwatile uuli onse, pakwebati Shinwe wa mumulu nao akamyeyelele ifilubo fyenu."²⁶ Balishile ku Yerusalemu nakabili. Lintu Yesu alikwenda mwi tempele, bashimapepo bakalamba, bakalemba, na bakalamba balishile kuli ena.²⁸ Balilandile kuli ena ati, "Nikumaka nshi ucitila ifi fintu, kabili nani wakupele insambu ucitilako ifi?"²⁹ Yesu alilandile kuli bena ati, "Nkomipushako ilipusho limo. Njebeni nanebo nkomyeba ku nsambu ncitila ifi finfu."³⁰ Ulubatisho lwakwa Yohane, bushe lwafumine ku mulu nangu ku bantu? Ngasukeni.³¹ Balilanshenye umo babelele no kutalikana kabili balyebele ati, "Umfwa tweba ati, 'ni ku mulu,' akotweba ati, 'Nindo mushamuceteelele?'³² Lelo umfwa tweba ati, 'Kufuma ku bantu,...'." Balikutina abantu, pantu bonse balishininkishe ukwebati Yohane ali ni kasesema.³³ Elo balyaswike Yesu no ku mwebati, "Tatwishibile." Kabili Yesu alilandile kuli bena ati, "Nanebo nshamyebe insambu ncitila ifi fintu."

12

¹Nolu Yesu alitampile ukubasambilisha mu milumbe. Alilandile ati, "Umuntu alilimine ibala lya myangashi, alishingulwisheko ulubao, nokwimba icilindi cakukaminamo umwangashi. Alikulile ulupungu no kushila ibala lya myangashi ku balimi ba myangashi. Nolu alile palwendo. Pa nshita yakulinga, alitumine umubomfi ku balimi ba myangashi kukuya kupokako kuli bena ifisabo fya myangashi.³ Lelo balimwikete, balimumine, no ku mutamfya aile iminwe - nkutwa.⁴ Nakabili alitumineko na umbi umubomfi, kabili nao balimucenene mu mutwe no ku musebanya.⁵ Lelo alitumine na umbi, kabili uyu ena balimwipewe. Balicushishe abengi mu nshila imo ine, ukupuma bamo no kwipaya bambi.⁶ Alishelepo no muntu umo uwakutuma, umwana uwatemwikwa. Ewali uwakulekelesha ukutuma kuli bena. Alilandile ati, 'Bakacindikako umwana wandi.'⁷ Lelo abalimi ba myangashi balilandile kuli umo no mubiye ati, 'Uyu empyani. Iseni, na tumwipaye, nefya bupyani fikaba fyesu.'⁸ Balimwikete, balimwipewe, kabili balimuposele kunse ye bala.⁹ Eco, bushe nindo umwine we bala akacita? Akesa konaula abalimi ba myangashi no kupela ibala kuli bambi.¹⁰ Bushe tamwa belenga ilembo ili? ilitila ati, 'Ilibwe ilyo bakakula basulile elyo baisakupanga ilyapa cifutu.'¹¹ Ici cafumine kuli Shikulu, kabili cipesha mano ku menso yesu."¹² Panuma ya ifi intungulushi shaba Yuda shalifwailishe inshila shakwikatilamo Yesu pantu balilwike ukwebati ebo alikumina uyu mulumbe. Lelo balikutina ibumba. Eco balimushile kabili balile.¹³ Nolu balitumineko bamo abafarise na bena Herode ukwebati bamu beleleke ne fyebo.¹⁴ Ulo baishile, balimwebele ati, "Kasambilisha, ifyo abantu bakotontokanya tafimikumine pantu tamulanga kapatulula kuuli onse. Mwebo icine cinefye musambilisha inshila yakwa Lesa. Bushe lifunde ukupela umusonko kuli Kaisare nangula iyo? Bushe tufwile ukulipila nangula iyo?"¹⁵ Lelo Yesu alishibe bu bumbi munda bwabo no kulanda kuli bena ati, "Nindo mukongesesho? Ndeteleniko indalama yakuti ndoleshepo."¹⁶ Baliletelepo imo kuli Yesu. Alilandile kuli bena ati, "Bushe cimpasho kabili malembo yakwa ni aya?" Balyasukile ati, yakwa Kaisare."¹⁷ Yesu alilandile ati, "Kanshi peleni kuli Kaisare ifintu fyakwa Kaisare, na kuli Lesa ifintu fyakwa Lesa." Awe balimupapile.¹⁸ Nomba abasadi, abalanda ati takwaba kushukuka, balishile kuli ena, Balimwipwishe, ukwebati,¹⁹ "Kasambilisha, Mose alitulembele ati, 'Umfwa munyina wa muntu afwa kabili asha umukashi, ukwabula umwana, munyina afwile abula mukamunyina, no kufyalila munyina abana.'²⁰ Kwali bamunyina cinelubali; uwa ntanshi aliyupile kabili alifwile, ukwabula abana."²¹ Elo uwa cibili alimupile nao alifwile, tashilemo mwana, nowa citatu inshila imo ine.²² Abali cine lubali tabashilemo abana. Pakulekelesha pali bonse, umwanakashi nankwe alifwile.²³ Mukushukuka, ulo bakabuka na kabili, akaba mukashi wakwa nani? Pantu ba munyina bonse cinelubali balimupile ukuba umukashi wabo."²⁴ Yesu alilandile ati, "Bushe uyu temulandu mwakwatila icilubo, ico tamwaishiba amalembo nangula amaka yakwa Lesa?"²⁵ Pantu ulo bakabushiwa ku bafwa, tabakope nangula ukupwa, lelo bakaba kubati ni bamalaika mu mulu.²⁶ Lelo palwa bafwa abakabushiwa, bushe tamwabelenga mu citabo cakwa Mose, pa

mulandu wa cimpukusa, ifyo Lesa alandile kuli ena no kwebati, 'Ninebo Lesa wakwa Abrahamu kabili Lesa wakwa Isaki kabili Lesa wakwa Yakobo?' ²⁷Te Lesa wa bakufwa, lelo aba mweo. Mwaliluba." ²⁸Umo uwa muli bakalemba alishile no kumfwa ifyo balikulanshanya; Alimwene ukwebati Yesu alibaswike bwino. Alimwipwishe ati, "lifunde nshi ilya cindama ukucila yonse?" ²⁹Yesu alyaswike ati, "Ilyakucindamisha nili 'Umfwa, we Israeli, Shikulu Lesa wesu, Shikulu abafye umo. ³⁰Ufwile ukotemwa Shikulu Lesa obe no mutima obe onse, no mweo obe onse, na mano yobe yonse, na maka yobe yonse.' ³¹Ifunde Iya bubili nili, 'Ulekutemwa umwina mupalamano obe nga fintu waitemwa.' Takuli ifunde ilikalamba ilyakucila pali aya." ³²Kalemba alilandile ati, "Kasambilisha, wabune! "Mulilandile icine ati Lesa umo, kabili takuli umbi ukucila pali ena. ³³Ukumutemwa no mutima onse na ku mucetekanya onse na ku maka yonse, no kutemwa umwina mupalamano nga fintu waitemwa kwa cilapo ukucila ifya ocewa fyonse na malambo." ³⁴Ulo Yesu amwene ukwebati alyaswike bwino, alilandile kuli ena ati, "Tauli kutali no bufumu bwa kwa Lesa." Panuma ya ifyo, tapali nangu umo uwafwaile ukumwipusha amepusho na yambi. ³⁵Lintu Yesu alikusambilisha mwi tempele, alilandile ati, "Bushe ninshiabela ukwebati bakalemba balanda ati Kristu mwana wakwa Dabidi?" ³⁶Dabidi umwine, mu Mupashi wa Mushilo, alilanda ati, Shikulu alilandile kuli Shikulu wandi, "Ikala kukuboko kwa kulyo kwandi nkasuke nkabike abalwani bobe ica kunyantapo amakasa yobe." ³⁷Dabidi umwine amwita ati, 'Shikulu,' eco Kristu engaba shani umwana wakwa Dabidi?" Ibumba ilikalamba lyalisekelele ukukutika kuli ena. ³⁸Mukusambilisha kwakwe Yesu alilandile ati, "Cengeleni na bakalemba, abatemwa ukwenda na malaya ayatali no kulabaposhiwa mu ncende ya mu mishika, ³⁹nokwikala pa fipuna fya bucindami muma sunagoge ne ncende sha kucindama pa mitebeto. ⁴⁰Kabili balapokolola bamukamfwilwa amayanda, kabili balapepa amapepo ayatali pakwebati abantu ba bamone. Aba bantu bakapokelekela ukusekwa kukalamba." ⁴¹Kabili Yesu aikela apalungatene ne cipao mu ncende ye tempele; alikulolekesha ifyo abantu balikuposa indalama mu cipao. Abakankala abengi balibikilemo indalama ishing. ⁴²Nolu mukamfwilwa umo umupina aishile kubikamo tu ndalama twa mukuba tubili, utukwete fye akabukumu kanono. ⁴³Alikutile abasambi bakwe no kulanda kuli bena ati, "Mucinefye nkomweba nati, uyu mukamfwilwa umupina abikamo ukucila bonse fye abacisangwila mukuposa mu cipao. ⁴⁴Pantu bonse bapele ifya mu bwingi bwabo. Lelo uyu mukamfwilwa, ukufuma mu bupina, aliposelemo shonse isho akwete mu bwikashi bwakwe."

13

¹Ulo Yesu alikufuma mwi tempele, umo uwa pa basambi bakwe alilandile kuli ena ati, "Kasambilisha, lolesheni amambwe yabune ne fikulwa fyabune!" ²Yesu alilandile kuli ena ati, "Bushe ukomona ifi fikulwa ifikalamba? Takuli ilibwe nangu limo ilikashala pa libwe linankwe ilitakapone panshi." ³Ulo aikele pa Lupili lwa Miolife apalungatene ne tempele, Petero, Yakobo, Yohane na Andrea balimwipwishe ku mbali ati, ⁴"Twebeni, bushe nililali ulo ifi fintu fikacitika? Cinshi cikaba icishibilo ulo ifi fintu fyonse fyalapamina ukucitika?" ⁵Yesu alilandile kuli bena ati, Mucenjele ukwebati nangu umo emilufya. ⁶Abengi bakeshila mwi shina lyandi no kulanda ati, 'Nine ena,' kabili bali no kulufya abengi. ⁷Ulo mukomfwa pa nkondo na ma ngufu - ngufu ya nkondo, mwikatina; ifi fintu fifwile fycitika, lelo impela tailafika. ⁸Pantu uluko lukemina uluko, no bufumu bukemina ubufumu. Kukaba ifinkukuma mu ncende ishing, ne fipowe. Iyi entendekelo ya bucushi bwa pa kupapa. ⁹Mube abalola. Bakamutwala ku filye, kabili mukalopolwa muma sunagoge. Mukeminina ku finso fya bakateka ne shamfumu palwa nebo, ngo bunte pali bena. ¹⁰Lelo imbila nsuma ifwile yabilwa ku nko shonse. ¹¹Ulo bamwikata no kumipela ku cilye, mwikasamikwa nefyo mufwile ukulanda. Pantu pali ilya nshita, ifyo mufwile ukulanda fikapelwa kuli mwebo; te mwebo mukalalanda, lelo Mupashi wa Mushilo. ¹²Munyina akapela munyina ku kwipaiwa, na wishi akafutukila umwana wakwe. Abana bakemina abafyashi babo no kubalenga ukwipaiwa. ¹³Mukapatwa kuli bonse pamulandu we shina lyandi. Lelo uyo onse uukashipikisha ukufika ku mpela, uyo muntu akapusuka. ¹⁴Ulo mwamona ica muselu ica makankamike caimanina epo tacilingile ukuba, " (lekeni uukobelenga eluke) "lekeni abo abali mu Yudea bafulumukile ku mpili, ¹⁵lekeni uyo uuli pa mutenge eya mu ng'anda nangu ukusendamo icili conse, ¹⁶kabili lekeni uyo uuli mwibala ebwelela mukusenda insalu yakwe. ¹⁷Lelo akalanda kubali na mafumo na ba koonsha muli isho nshiku! ¹⁸Pepeni ukwebati cikaba mu nshita ya mpepo. ¹⁹Pantu isho shikaba ni nshiku sha kumanama, isho ishishatala ashibako ukufuma ku kutendeka kwa bubumbo, ubo Lesa alengele, ukufika na lelo, iyo, kabili takwakatale akuba nakabili. ²⁰Kanofye Shikulu acefya inshiku, takuli muntunse nangu umo uwingapusuka. Lelo pamulandu wa basalwa, abo abo aisalile, akacefya inshiku. ²¹Nolu umfwa uuli onse alanda kuli mwebo ati, 'Lolesheni, Kristu ali kuno!' nangu 'Lolesheni, uyo ali uko!' mwikasumina. ²²Pantu kukesha ba Kristu ba bufi na ba kasesema ba bufi bakalanga ifilangililo ne fisungusho mukulufya, nga cingacitwa, na basalwa. ²³Mulekulola! Namyebela limo ifi fintu fyonse. ²⁴Lelo panuma ya bucushi bwa nshiku shilya, 'akasuba kakafimbwa nemfimi, umweshi tawakapele ulubuto lwa uko, ²⁵intanda shikapona ukufuma mu mulu, ne fya maka ifyaba mu mulu fikatenkanishiwa.' ²⁶Elo bakamono Umwana wa Muntu akoisa mu makumbi na maka yakalamba no bukata. ²⁷Nolu akatuma bamalaika bakwe kabili akalonganika abasalwa bakwe muntupinda tune, ukufuma kumpela ye sonde no kufika kumpela ya mulu. ²⁸Sambilileni isambililo ku cimuti ca mukunyu. Iintu fye umusambo wakwata amabula ayateku no kulukusha amabula ya uko, mwishibe ati amaina yalipalamine. ²⁹Eco kanshi, ulo mwamona ifintu ifi fikocitika, ishibeni ukuti akoisa ali mupepi, mupepi ne mpongolo. ³⁰Mucinefye nkomweba nati, iyi nkulo tayakapite mpaka ifi fintu fyonse fikacitike. ³¹Umulu ne sonde fikapita, lelo ifyebo fyandi tafyakapite. ³²Lelo pali bulya bushiku ne nshita ilya, takwaba uwaishiba, nangu ni bamalaika mu mulu, nangu Mwana, lelo kano Tata. ³³Cenjeleni! Loleni, pantu tamwaishibile akashita. ³⁴Cili kubati muntu asha ing'anda no kuya kumbi palwendo - asha apela ababomfi bakwe amaka pa ng'anda, cila umo no mulimo wakwe, no kukonkomesha kalinda wa pa mwinshi ukuba uwa

kulola.³⁵Eco mube abakulola pantu tamwaishiba ulo shikulu wa ng'anda akesa; na limo ku cungulo, na limo ubushiku pakati, ulo mukolwe alila, nangu ulucelo.³⁶Umfwa aisa mukupumikisha, mwileka akamusange mulilele.³⁷Ifyo naeba mwebo efyo nkoeba bonse: Loleni!"

14

¹Nomba kwashele inshiku shibili ku Cakucilila no Mutebeto wa Mukate Uutatutumuka. Bashimapepo bakalamba na ba kalemba balikufwailikisha umwa kwikatila Yesu mu bucenjeshi no ku mwipaya. ²Pantu balikulanda ati, "Tekuti tumwikate pa mutebeto, pantu kuti fyaleta icimfulunganya ku bantu."³Lintu Yesu ali mu Betani mu ng'anda yakwa Simone uwali ne fibashi, ulo ali alikuweme kwi tebulo ku kulya, kwalishile umwanakashi alikwete ne botolo lya alabastere wa mafuta ya mutengo, yali ayeneyene nardi. Alitobebe ibotolo no kwitila amafuta ya nardi pa mutwe wakwe. ⁴Lelo pali bamo abafuililwe. Balikulanshanya umo babelele no kulanda ati, "Ninshi kwabela ubu bonaushi bwa mafuta?" ⁵Amafuta aya nga yalishitishiwe indalama ishacila pa indalama imyanda amakumi yatatu, no kupela ku bapina." Nolu balikalipile umwanakashi.⁶Lelo Yesu alilandile ati, "mulekeni umwine. Nindo mwebo mukomucushisha? Alicitile icintu icabune kuli nebo. ⁷Abapina mwaba nabo lyonse, na lyonse ulo mukofwaya kuti mwabacitila icabune, lelo te lyonse tukaba nemwe. ⁸Uyu alicitile efyo engacita. Asubila limo umubili wandi amafuta yapa kushikwa. ⁹Mucinefye nkolanda kuli mwebo nati, konse uko imbila nsuma ikabilwa mu calo conse, uyu mwanakashi ifyo acita fikalalandwapo, mu kumwibukisha."¹⁰Elo Yuda Iscariote, umo uwa mu bekumi na babili, aile kuli bashimapepo bakalamba pakwebati amupele kuli bena. ¹¹Ulo bashimapepo bakalamba baumfwile ifi, balisansamwike kabili balimulaile ukumupa indalama. Alitendeke ukufwaya inshila yakumufutukilamo pakwebati amupele kuli bena. ¹²Pa bushiku bwa kubalilapo ubwa mukate uutatutumuka, ulo bepaya ica kucilila, abasambi balilandile kuli ena ati, "Nikwi mukofwaya fwebo ukuya kupekanya, ukwebati muyekulya ica kucilila?" ¹³Alitumine babili aba mu basambi bakwe no kulanda kuli bena ati, "kabiye ni mu musumba, mukokumanya umwaume uusendele umutondo wa menshi. Mu mukonke. ¹⁴Apo akoya kwingila mu ng'anda, mukonkeni mukati no kweba umwine wa ng'anda, ukweba ati 'Kasambilisha alilanda ati, "Bushe umuputule wandi uwa beni ulikwi umo tukolila icakulila na basambi bandi?"¹⁵Ako mulanga umuputule wa pamulu uukalamba uwabune. Mutupekanishe mulya." ¹⁶Abasambi balimushile nokuya mu musumba. Balisangile fyonse ifyo alandile kuli bena, kabili bapekenye ica kucilila. ¹⁷Ulo cali icungulo, alishile na bekumi na babili. ¹⁸Elo bakuweme kwi tebulo no kulya, Yesu alilandile ati, "Mucinefye nkolanda kuli mwebo nati, umo uo tukolya nakwe akomfutuka." ¹⁹Bonse baliketwe no bulanda, kabili umo na umo balilandile kuli ena abati, "Mucinefye te nebo?"²⁰Yesu alyaswike no kulanda kuli bena ati, "ni umo uwa be kumi na babili, uletobela nanebo mu lunweno. ²¹Pantu Mwana wa Muntu ali no kuya ifyo calembwa pali ena. Lelo akalanda kuli ulya muntu uyo Mwana wa Muntu akofutukwako! Nga caliwe me kuli ena umfwa tafyelwe."²²Ulo bali bakolya, Yesu alibulile umukate, ali upalile, no kuumokaula. Alipele kuli bena no kulanda ati, "Buleni. Uyu mubili wandi." ²³Alibulile ulukombo, alitotele, no kupela kuli bena, nabo balinwinemo. ²⁴Alilandila kuli bena ati, "Uyu mulopa wandi uwa cipangano, umulopa uukoitikila abengi. ²⁵Icinefye nkolanda kuli mwebo nati, nshakanweko na kabili icisabo ca kuli uyu myangashi mpaka bukafike ubushiku bulya ulo nkanwa icipya mu bufumu bwakwa Lesa."²⁶Ulo baimbile ulwimbo, balile ku lupili lwa Miolife. ²⁷Yesu alilandile kuli bena ati, "Bonse mwebo mukoya, pantu calilembwa aciti, nkoma kacema ne mpanga shikasalangana."²⁸Lelo panuma ya kubuka kwandi, nkamitangilila ku Galili." ²⁹Petero alilandile kuli ena ati, "Nangulafye bonse bengaya, nebo iyo." ³⁰Yesu alilandile kuli ena ati, "Mucinefye nokweba nati, ilelo - ee, lelolinefye ubushiku - libe mukolwe talalila imiku ibili ukonkana imiku itatu." ³¹Lelo Petero mu maka alilandile ati, "Nangufye kufwa nenu, nshaka mikane." Bonse balilale icilayo cimo cine. ³²Balishile ku ncende itwa Getsemani, kabili Yesu alilandile ku basambi bakwe ati, "Ikale ni pano ulo nkopepa." ³³Alisendelepo Petero, Yakobo, na Yohane ukuya nabo kabili alitendekele ukusakamikwa no kucushiwa nganshi. ³⁴Alilandile kuli bena ati, "Umweo wandi uliketwe no bulanda ubukalamba nganshi, uku fikafye naku cipimo cakufwa. Shaleni pano kabili mulekulola." ³⁵Ukuyako akatalamukila, Yesu aliwile panshi kabili alipepele ukwebati umfwa cingacitwa aka akashita ukumupita pali ena. ³⁶Alilandile ati, "Abba, Tata, ifintu fyonse fyakwanguka kuli mwebo. Fumyenipo ulu lukombo pali nebo. Lelo tekufwaya kwandi, kano ukufwaya kwenu." ³⁷Alibwele kabili asangile balilele, kabili alilandile kuli Petero ati, "Simone, mulillele? Tekuti mulolefye pa nsa imo?" ³⁸Loleni no kupepa pakwebati mwiponena mu matunko. Umupashi mucinefye ukofwaya, lelo umubili ulinakile." ³⁹Nakabili alibwelelemo nukuya kupepa, kabili alibomfeshi amashiwi yamoyene. ⁴⁰Ulo abwelele nakabili, alisangile balilele, pantu amenso yabo yalifinine. Tabaishibile ifyakulanda kuli ena. ⁴¹Alibwelele umuku wakulenga butatu no kulanda kuli bena ati, "Bushe mucili mulilele kabili mukotusha? Fyafula! Inshita yafika. Lolesheni! Umwana wa Muntu bako mufutukila mu maboko ya bamasambi. ⁴²Bukeni; natulekuya. Lolesheni, uyo uuko mfutuka alipaleme." ⁴³Ulo acili akolanda, Yuda, umo uwa pa bekumi na babili, alifikile, ne bumba ilikalamba lyali pamo nankwe balikwete bapanga ne nkonto, ukufuma kuli bashimapepo bakalamba, bakalamba, na bakalamba. ⁴⁴Nomba uwa kumufutuka alibapele icilangililo, ukwebati, "Uo nalatomona ninshi eo. Mwikateni kabili mumupite no kumusopa." ⁴⁵Ulo Yuda afikile apopenefye alishile kuli Yesu no kulanda ati, "Rabbi," kabili alimutomwene. ⁴⁶Nolu balimwikete no ku mupita. ⁴⁷Lelo umo uwa muli bena uwaiminine lubali alifumishe ulupanga no kukoma umubomfi wakwa shimapepo mukalamba no kumuputula ukutwi. ⁴⁸Yesu alilandile kuli bena ati, "Bushe mwishile kubati mwimine akapondo, na bapanga ne nkonto, mukunjikata?" ⁴⁹Ulo nali nenu cila bushiku kabili nali kusambilisha mwi tempele, ta mwanjikete. Lelo ifi fyalicitikile pakwebati amalemba ya fikilishiwe." ⁵⁰Bonse abo abali na Yesu balimushile no kubutuka. ⁵¹Umulumendo, uwafwelefyey insalu ya kolokondwe iyo iya mukubenye, alikukonka Yesu. Ulo abaume bamwikete, ⁵²alishile ilaya lya kolokondwe kabili

alibutukile ubwamba.⁵³ Balitwele Yesu kuli shima pepo mukalamba. Kulya balikolongene nankwe pamo bonse bashima pepo bakalamba, abakalamba, na bakalemba.⁵⁴ Nomba Petero alikubakonka akatalamukila, ukufikafye na mulubansa lwakwa shima pepo mukalamba. Alikele apaikela ifita, akoonta umulilo.⁵⁵ Nomba bashima pepo bakalamba na bonse bashi cilye ba baYuda balikufwaya ubunte bwabufi pali Yesu pakwebati bamwipaye. Lelo tababusangile.⁵⁶ Pantu abengi baliletele amabunte ya bufi kuli ena, lelo no bunte bwabo tabwasuminike.⁵⁷ Bamo balimine no kuleta ubunte bwabufi pali ena; balilandile ati,⁵⁸ "Twalimumfwile akolanda ati, 'Nkabongolola ilitempele ilya pangwa ne minwe, na mu nshiku shitatu nkakula limbi ilishapangwa ne minwe.'" ⁵⁹ Lelo no bunte bwabo bwine tabwasuminike.⁶⁰ Shima pepo mukalamba alimine pali bena no kwipusha Yesu ati, " Bushe taukwete kwasuko? Findo ifi aba bantu bakolanda pali webo?" ⁶¹ Lelo alifye tondolo kabili taaswike nangu cimo. Nakabili shima pepo mukalamba alimwipwishe no kulanda ati, "Bushe niwe Kristu, Umwana Wa Wapalwa?" ⁶² Yesu alilandile ati, "Ninebo; kabili ukamona Umwana wa Muntu ulu akekala kukuboko kwa kulyo ukwa maka no kwisa na makumbi ya mumulu."⁶³ Shima pepo mukalamba alilepwile amalaya yakwe no kulanda ati, "Bushe tucili tukofwaya bakambone?" ⁶⁴ Mulyumfwile imiponto. Mukopingula shani?" Bonse balimusekele nga umo uulingile ukufwa. ⁶⁵ Bamo balitendeke ukumusakila amate no kumufimba pa menso kabili balimumine na makofi no kulanda kuli ena ati, "Sesema!" Abashilika balimusendele no kumuma.⁶⁶ Ulo Petero ali mulubansa, umo pa babomfi banakashi abakwa shima pepo mukalamba alishile kuli ena. ⁶⁷ Alimwene Petero akoonta umulilo, kabili alilolekeshe sana pali ena no kulanda ati, " Nebo wine wali pamo no mwina Nasarete, Yesu." ⁶⁸ Lelo alikene, ukwebati, "Nebo nteshibile nangula ukwiluka ifyo ukolandapo." Nolu alifumine no kuya pampongolo. Na mukolwe alililile.⁶⁹ Lelo umubomfi umwanakashi alimumwene kabili alitendeke ukulanda nakabili kuli abo abaiminine palya, "Uyu mwaume ni umo pali bena!" ⁷⁰ Lelo alikene nakabili. Panuma fye ya kashita akanono abo abaiminine palya balikulanda kuli Petero ati, " Mucinefye webo uli umo uwa muli bena, pantu webo nobe wine uli mwina Galili."⁷¹ Lelo alitendeke ukuitipwilafye umwine no kulapa, "Nshimwishibile uyu muntu mukolandapo." ⁷² Apopenefye na mukolwe alililile umuku wakulenga bubili. Nolu alibukishe amashiwi ayo Yesu alandile kuli ena ati: "Ulo mukolwe talalila imiku ibili, ukonkana imiku itatu," kabili aliwile panshi no kulila.

15

¹ Ulucelo celo, bashima pepo bakalamba, pamo na bakalamba na bakalemba ne cilye conse ica ba Yuda balipandishenye amano. Nolu balikakile Yesu no kumupiita. Balimutwele noku mupela kuli Pilato. ² Pilato alimwipwishe ati, "Bushe uli mfumu yaba Yuda?" Ali mwaswike ati, "Ulilandile ifyo fine." ³ Bashima pepo bakalamba balikumutunganya ifintu ifingi. ⁴ Pilato nakabili alimwipwishe ati, "Bushe taukopela kwasuko?" Mona ifintu ubwingi bakokutunganya nafyo!" ⁵ Lelo Yesu tali kwasuka Pilato iyo, kabili nefyo fyalimusungwishe.⁶ Nomba pa nshita ya mutebeto, ilingi Pilato alikulekelelako kuli bena umufungwa umo, umufungwa uo balikufwaya abene. ⁷ Kabili kwali umuntu uwalikwitwa Baraba mu cifungo na ba cisanguka abali ne milandu ya kwipaya mu nshita ya busangu. ⁸ Ne bumba lyalishile kuli Pilato kabili balitendeke ukumwipusha ukubacitilako ifyo alikucita na mu nshita sha kale. ⁹ Pilato alibaswike no kubeba ati, "Bushe mukofwaya nebo mikakwileko Imfumu yaba Yuda?" ¹⁰ Pantu alishibe ukwebati ni pamulandu wa kalumwa bashima pepo bakalamba bapelele Yesu kuli ena. ¹¹ Lelo bashima pepo bakalamba balisongelekenye ibumba ukubilikisha ukwebati kanshi Baraba eo akakulwe. ¹² Pilato alibasukile nakabili no kubeba ati, "Nindo nkocita ne Mfumu yaba Yuda?" ¹³ Balibilikeshe na kabili abati, "Mutanikeni!" ¹⁴ Pilato alilandile kuli bena ati, "Bubi ndo acitile?" Lelo balicilimofye ukubilikisha ati, "Mutanikeni." ¹⁵ Pilato alikufwaya ukusekesha ibumba, eco alibakakwilile Baraba. Alifupawile Yesu kabili alimupele ukuya kutanikwa. ¹⁶ Abashilika bali mutwele mukati ka lubansa (ulo ulwali cipango ca buteko), kabili balikutile ne mpuka yonse iya bashilika. ¹⁷ balimufwikile Yesu no mwingila wa kukashikila, kabili balipikwile ne cilongwe ca myunga no kumufwika. ¹⁸ Balitendeke no kumuposha kapuni - kapuni ukwebati, "Mulopwe, we Mfumu yaba Yuda!" ¹⁹ Balimumine ku mutwe ne cetete no kumusakila amate. Balifukeme no kukontama pali ena. ²⁰ Cilya bamupumya, balimufulile umwingila wa kukashikila no kumufwika amalaya yakwe, kabili bali mupitile no kuya mukumutanika. ²¹ Umwaume umo, Simone waku Kurene ali akoisa ukufuma mu mpanga (ali ni wishu wakwa Alekesandere na Rufu), kabili balimupatikishe ukumusendelako icapindama. ²² Abashilika baliletele Yesu pa ncende iyo balikwita Golgota (icalola mukwebati "Incende ya Cipanga"). ²³ Balimupele umwangashi wasankana na muri, lelo taunwine. ²⁴ Balimutanike kabili balyakene amalaya yakwe pakuteya ifyakupendula pakwishiba cila mushilika icipimfya akosenda. ²⁵ Yali ni nsa yakulenga shitatu ulu bamutanike. ²⁶ Pa cishibilo balilembelepo umulandu wakwe ati, "Imfumu yaba Yuda." ²⁷ Pamo nankwe balitanikilepo utupondo tubili, kamo ku kulyo nakambi nako ku kuso kwakwe. ^{28,29} Na balikupita balimusawile, balikupukunya ne mitwe no kulanda ati, "Tepapa! Webu we wingatoba itempele no kulikula mu nshiku shitatu, ³⁰ ipususha kabili ikila pa capindama!" ³¹ Munshila imo ine bashima pepo bakalamba balikumupumya umo no munankwe, pamo na bakalemba, no kweba ati, "Alipuswishe bambi, lelo tekuti aipususha umwine. ³² Leken Kristu, Imfumu yakwa Israeli, ikile nomba ukufuma pa capindama, pakwebati tumone no kusumina." Balya batanikilwe pamo nankwe nabo balimusawile. ³³ Pa nsa yakulenga mutanda, kwalishile kuba imfinshi pa calo conse ukufika na ku nsa yakulenga pabula. ³⁴ Na pa nsa yakulenga pabula Yesu alililile ne shiwi likalamba ati, " Eloi, Eloi, lama sabaktani?" Icilepilibula ukwebati, "Lesa wandi, Lesa wandi, nindo mwandekesha?" ³⁵ Kabili bamo abaiminine mupepi balyumfwile amashiwi yakwe no kwebati, "Moneni, akokuta Eliya." ³⁶ Umbi alibutwike, ukuya kubika umwangashi wakukantuka ku mwepu, uwali kwitete, no kumupela ukwebati anwe. Umwaume alilandile ati, "Leken tumone umfwa Eliya akoisa kumwikisha panshi." ³⁷ Kabili Yesu alililile umusowa ukalamba kabili alifwile. ³⁸ Ne cialu ca mwi tempele calilepwike ukufuma pa mulu ukufika panshi. ³⁹ Ulo umukalamba

wa bashilika uwaiminine aliloleshe Yesu alimwene umusango afwililemo, alilandile ati, "Cinefye uyu muntu ali Mwana wa kwa Lesa." ⁴⁰Kabili kwali bana mayo abalikulolesha akatalamukila, Palibo pali Maria umwina Magadala, Maria (Nina wakwa Yakobo umwaice na Yose), na Salome. ⁴¹Ulo ali mu Galili balimukonkele no kumupyungila. Na ba namayo abengi balishile nankwe ku Yerusalemu. ⁴²Ulo icungulo cafika, pantu bwali Bushiku bwa Kupekanya, ekwebati, ubushiku bwatangelila Isabata, ⁴³Yosefe waku Arimatea alishile palya. Alipelwe umucinshi paba mucilye uwali kulolela ubufumu bwakwa Lesa. Alingile mukushipa kuli Pilato no kulomba umubili wakwa Yesu. ⁴⁴Pilato alipapile ukwebati Yesu alifwile kale, alikutile umukalamba wa bashilika no ku mwipusha umfwa Yesu alifwile. ⁴⁵Ulo Pilato aishiba ukufuma ku mukalamba wa bashilika ukwebati Yesu alifwile, alipele umubili kuli Yosefe. ⁴⁶Yosefe alishitile insalu ya kolokondwe. Alimwikishe ukumufumya pa capindama, amukubanya mu nsalu ya kolokondwe, no kumulalika mu nshishi iya imbwa mwi libwe. Elo akunkulushishapo ilibwe pa mwinshi wa nshishi. ⁴⁷Maria umwina Magadala na Maria nina wakwa Yose balimwene incende epo bashikile Yesu.

16

¹Ulo Isabata lyapitile, Maria umwina Magadala, Maria nyina wakwa Yokobo, na Salome balishitile ifya cena cabune pakweba ati baye kusuba umubili wakwa Yesu. ²Ulu celo celo pa bushiku bwa ntanshi ubwa mulungu, balile ku nshishi ulo akasuba katulile. ³Balikulanda kuli umo no munakwe ati, "Ninani akoya kutukunkulushishapo icilibwe pa mwinshi wa nshishi?" ⁴Ulo balolekeshe, balimwene ati icilibwe cili kunkulushiwepo, pantu calikulishe. ⁵Balingile mu nshishi no kumona umulumendo uwafwele ilaya lya kubuta, alikele ku kulyo, balitinine. ⁶Alilandile kuli bena ati, "Mwitina. Mukofwaya Yesu, umwina Nasarete, uwatanikwe. Alibukile! Tali muno. Lolesheni apo bamulalike. ⁷Lelo kabiyeni, muyekweba abasambi bakwe na Petero, 'Akomitangelila ku Galili. Kulya eko mukamumona, ngefyo amyebile.'" ⁸Balifumineko no kufulumuka ku nshishi; balikututuma kabili balipeshiwe amano. Tabaebeleko umuntu nangu umo pantu balitinine nganshi. ⁹Lucelo celo pa bushiku bwa ntanshi ubwa mulungu, panuma ya kubuka, abalilepo ukumonekela kuli Maria umwina Magadala, uo Yesu atamfishemo ingulu cinelubali. ¹⁰Alile no kuya kweba abo ali nabo, ulo balikullosha no kulila. ¹¹Balyumfwile ati wa Mweo kabili ali mu mwene, lelo tabasumine. ¹²Panuma ya ifi fintu alimonekele mu musango wa ibela kuli babili ulo balikwenda mu mpanga. ¹³Balibwekelele no kuya kushimikilako abanabo, lelo tababasumine. ¹⁴Panuma Yesu alimonekele kube kumi na umo ulo bakuweme kwi tebulo ku kulya, kabili alibakalipile pakukana cetekela kwabo na bunkosa mitima bwabo, pantu tabacetekele abo abamumwene ulo abukile ku bafwa. ¹⁵Alilandile kuli bena ati, "Kabiyeni mu calo conse, no kubila imbila nsuma ku fibumbwa fyonse. ¹⁶Uyo onse uwacetekela no ku batishiwa akapusuka, lelo uushakacetekele akasekwa. ¹⁷Ne fishibilo ifi fikakonka abacetekela: Mwishina lyandi bakatamfishamo ingulu. Bakalandila na mundimi shimbi. ¹⁸Bakekata insoka ku minwe, kabili umfwa banwa icili conse icakubepaya, tacakabacite akabi. Bakabika indupi shabo pa balwele nabo bakaposhiwa." ¹⁹Panuma Shikulu Yesu apwile ukulanda nabo, alisendelwe alile mu mulu no kwikala ku kuboko kwa kulyo kwa kwa Lesa. ²⁰Abasambi balile kabili balishimikile conse, na Shikulu alikubombela pamo nabo no kushininkisha icebo kufishibilo ifyali kubakonka.